

বাণিজ্যিক দৃষ্টিভঙ্গি বনাম মানবিক দৃষ্টিভঙ্গি : একটি পর্যবেক্ষণমূলক পর্যালোচনা

মুহাম্মদ জসীম উদ্দীন

সহকারী অধ্যাপক, অর্থনীতি বিভাগ

সিলেট ক্যাডেট কলেজ, সিলেট

মোবাইল : +৮৮০১৭১২-৬১৩০৯৭

e-mail : jasim_uddin90@yahoo.com

বাণিজ্যিক দৃষ্টিভঙ্গি বনাম মানবিক দৃষ্টিভঙ্গি : একটি পর্যবেক্ষণমূলক পর্যালোচনা

সার - সংক্ষেপ

আলোচ্য প্রবন্ধে টেকসই উন্নয়নের প্রতিবন্ধক হিসেবে একটি মৌলিক বিষয় মানবিকতাকে উপেক্ষা করে বাণিজ্যিক দৃষ্টিভঙ্গির প্রসারের কুপ্রভাব এবং একই সাথে বিশ্ব ব্যাপি প্রকৃত টেকসই উন্নয়ন নিশ্চিত করতে চাইলে মানবিক দৃষ্টিভঙ্গি প্রসারের ওপর আলোকপাত করা হয়েছে। প্রবন্ধের শুরুতে লক্ষ্য ও উদ্দেশ্য এবং তথ্য ও পদ্ধতি সম্পর্কে আলোচনা করা হয়েছে। আধুনিক বাণিজ্যিক দৃষ্টিভঙ্গির উৎস এবং এর প্রসার, বাণিজ্যিক দৃষ্টিভঙ্গি প্রসারের নেতিবাচক দিক- এ বিষয়গুলো নিয়ে আলোচনা করা হয়েছে। বিশ্বব্যাপি প্রকৃত ও টেকসই উন্নয়ন নিশ্চিত করতে মানবিক দৃষ্টিভঙ্গি প্রসারের অপরিহার্যতার কথা উল্লেখ করা হয়েছে। প্রবন্ধের শেষাংশে মানবিক দৃষ্টিভঙ্গি প্রসারের গুরুত্বের ওপর আলোকপাত করা হয়েছে।

১. ভূমিকা :

একথা না বলার কোন উপায় নেই যে, বিশ্ব এগিয়ে চলছে তো চলছেই। দিন যত গড়াচ্ছে, এগিয়ে যাওয়ার গতি ততই বাড়ছে। প্রযুক্তিগত উন্নয়ন, তথ্য প্রযুক্তি, জ্ঞান বিজ্ঞান, আধুনিকতা, চাকচিক্য, দৃষ্টিনন্দন আধুনিক স্থাপনা, অবকাঠামোগত উন্নয়ন ইত্যাদি অসংখ্য ক্ষেত্রে ব্যাপক অগ্রগতি সাধিত হচ্ছে। এক্ষেত্রে সন্দেহ পোষণ করার কোন অবকাশ নেই। প্রশ্ন হলো এ উন্নয়নের মূলে আমাদের দৃষ্টিভঙ্গি কী? বাণিজ্যিক? নাকি মানবিক? এর সহজ উত্তর আমাদের এই অগ্রগতির কেন্দ্র বিন্দুতে রয়েছে বাণিজ্যিক মনোভাব বা বাণিজ্যিক দৃষ্টিভঙ্গি। অন্য কথায় বাণিজ্যিক দৃষ্টিভঙ্গি থেকে যদি এই বিশ্বকে দেখি তাহলে বলতে হবে বিশ্ব দ্রুত এগিয়ে চলছে। কিন্তু মানবিক দৃষ্টিভঙ্গি বিবেচনায় আমাদের কোনই অগ্রগতি নেই। আরো সহজ করে বললে বাণিজ্যিক দৃষ্টিভঙ্গি বিবেচনায় যেমন দ্রুত এগিয়ে চলছি, মানবিক দৃষ্টিভঙ্গি থেকে বিবেচনা করলে আমরা তেমনি পিছিয়ে যাচ্ছি।

বাণিজ্যিক দৃষ্টিভঙ্গি এবং মানবিক দৃষ্টিভঙ্গি সম্পর্কে খানিক আলোচনা করা যাক। বাণিজ্যিক দৃষ্টিভঙ্গির মূল বিবেচ্য বিষয় হলো অর্থ, অর্থের প্রতি লোভ, লালসা, মুনাফা, স্বার্থ, স্বচ্ছলতা, বিলাসিতা ইত্যাদি। আর এসব কিছু অর্জনে আমরা মেধা ও মননে লালন করি দুর্বৃত্তপনা, হিনমন্যতা, পেশীশক্তি, পাষবিকতা ইত্যাদি। অপর পক্ষে মানবিক দৃষ্টিভঙ্গির মূলে অর্থের স্থান নগণ্য। অর্থের চেয়ে মানবতা, সহযোগিতা, সহমর্মিতা, পারস্পরিক শ্রদ্ধা বোধ, অন্যের বিপদে এগিয়ে আসা ইত্যাদি বিষয়গুলো প্রধান্য পায়।

একজন মানুষের মধ্যে বাণিজ্যিক ও মানবিক উভয় দৃষ্টি ভঙ্গির সংমিশ্রণ থাকা স্বাভাবিক। এদুয়ের মধ্যে যাদের কাছে অর্থই সব কিছুর উর্ধ্ব বিবেচিত তারা বাণিজ্যিক দৃষ্টিভঙ্গি সম্পন্ন। অন্যদিকে যাদের কাছে অর্থের চেয়ে মানবতা, সহমর্মিতার গুরুত্ব বেশি তারা মানবিক দৃষ্টিভঙ্গি সম্পন্ন। একজন বাণিজ্যিক দৃষ্টিভঙ্গি সম্পন্ন মানুষ বাস্তববাদী হয়। সব কিছুই তিনি বাস্তব জ্ঞান দ্বারা মূল্যায়ণ করে। অপর পক্ষে একজন মানবিক দৃষ্টিভঙ্গি সম্পন্ন মানুষ আবেগ তাড়িত। বাণিজ্যিক দৃষ্টিভঙ্গি সম্পন্ন মানুষ বাস্তব জ্ঞান, বাস্তবতা দ্বারা সমাজকে উপলব্ধি করে এবং তা দ্বারা প্ররোচিত হয়। মানবিক দৃষ্টিভঙ্গি সম্পন্ন মানুষ আবেগ দ্বারা তাড়িত হয়। বাস্তবতা তাকে খুব একটা প্রভাবিত করতে পারেনা। বাণিজ্যিক দৃষ্টিভঙ্গি সম্পন্ন মানুষ চরম স্বার্থপর, অর্থলিপ্সু হয়। মানবিক দৃষ্টিভঙ্গি মানুষকে মানবতাবাদী ও আবেগ প্রবণ করে গড়ে তোলে। পৃথিবীতে বাস্তববাদী মানুষের সংখ্যা নগণ্য। সে তুলনায় আবেগ তাড়িত মানুষের সংখ্যা অসংখ্য, অগণিত। উন্নয়ন, অগ্রগতি যাই বলিনা কেন- কেবল বাণিজ্যিক দৃষ্টিভঙ্গি বিবেচনায় হওয়া কাম্বিত নয়। মানবিকতাকে উপেক্ষা করে উন্নয়ন হলে সমাজে অস্থিরতা, মারামারি, হানাহানি, বৈষম্য, বিভেদ, বিশৃঙ্খলা, বিভাজন বাড়তেই থাকবে। জ্ঞান বিজ্ঞানে আমরা এগিয়ে গেছি

বলে যতই দাবী করিনা কেন ? সমাজ থেকে অশান্তি, অসাম্য দূর করা সম্ভব হবেনা । বর্তমান বিশ্ব বাস্তবতার দিকে তাকিয়ে আমরা এই সত্যটিই দেখছি । বিশ্ব বাসীর দুর্ভাগ্য, এই যুগে যে উন্নয়ন সংগঠিত হচ্ছে তার মূলে রয়েছে বাণিজ্যিক দৃষ্টিভঙ্গি । মানবতার স্থান এতে নেই বললেই চলে ।

বাণিজ্যিক দৃষ্টিভঙ্গি মানুষকে চরম স্বার্থপর করে গড়ে তোলে । এ স্বার্থের কাছে অর্থই সব । বিবেক, বিবেচনা, মনুষ্যত্ববোধ- এ স্বার্থের কাছে বিসর্জিত, উপেক্ষিত । সহযোগিতা, সহমর্মিতা সহ এজাতীয় মানবিক গুণগুলো এ স্বার্থের কাছে কোন স্থান নেই । মানবিক গুণগুলো বিসর্জন দিয়ে অর্থ উপার্জনের সংস্কৃতি এ সভ্যতাকে এগিয়ে নিয়ে যাচ্ছে । সব কিছু অর্থ দিয়ে মূল্যায়ন করা এ এক ভয়ংকর সংস্কৃতি । একজন মানুষের মানবিক গুণ থাকা অত্যাবশ্যিক । সত্য হলো বাণিজ্যিক দৃষ্টিভঙ্গির কাছে মানবতা আজ নির্বাসিত । বাণিজ্যিক দৃষ্টিভঙ্গি এমন কোন কুকর্ম নেই যা মানুষকে দিয়ে করাতে প্ররোচিত করেনা । এখানে অর্থই সব । অর্থের কাছে সব কিছু জিম্মি । সবার উপরে স্থান পায় অর্থ । সব কিছুই অর্থের মানদে- বিবেচনা করা হয় । বাণিজ্যিক দৃষ্টিভঙ্গির প্রকৃত রূপ এতই কদাকার যে, ইহা বিশ্বব্যাপি নারীর সৌন্দর্যকে পণ্যে রূপান্তর করেছে । বাণিজ্যিক স্বার্থে নগ্নতা, যৌনতাকে সহজলভ্য, সুলভ করে তুলছে । যুব সমাজকে বিপথগামী করে ধ্বংসের দিকে ঠেলে দিতে স্থূলমানসিকতাকে ব্যবহার করা হচ্ছে আজ মুনাফা অর্জনের পণ্য হিসেবে, আর এতে প্রযুক্তিকে ব্যবহার করা হচ্ছে দেদারছে ।

যদি প্রশ্ন করা হয় বাংলাদেশ থেকে দুর্নীতিকে কেন সমূলে উৎপাটন করা যাচ্ছেনা ? কেন দারিদ্র্য দূরীকরণ করা সম্ভব হচ্ছেনা ? কেনই বা আজকের যুগের সবচেয়ে সহজতম কাজ সকল মানুষকে শিক্ষিত করে তোলা সম্ভব হচ্ছেনা ? পোশাক কর্মীদের জীবন মান উন্নত করার ব্যবস্থা নেয়া হচ্ছেনা কেন ? পাথর শ্রমিক, চা শ্রমিকরা কেন অযৌক্তিক মজুরিতে কাজ করতে বাধ্য হচ্ছে? বিশ্ব প্রেক্ষাপট বিবেচনায় এই চরম সভ্যতার যুগে বিশ্ব ব্যাপি এত যুদ্ধ কেন ? কেন দিনের পর দিন নতুন নতুন সংকট তৈরী হচ্ছে ? বিশ্বব্যাপি নিরাপত্তা সমস্যা কেন ক্রমশ: প্রকট আকার ধারণ করছে? এক কথায় এর উত্তর হচ্ছে বাণিজ্যিক দৃষ্টিভঙ্গির প্রসার । বাণিজ্যিক মনোভাব শিক্ষিত, স্বচ্ছল, সচেতন নামধারী মানুষদের গ্রাস করে ফেলছে । আর এর পরিণতিতেই সারা পৃথিবী জুড়ে এত অস্থিরতা, অরাজকতা, বৈষম্য, বিভেদ, হানাহানি । আবুল বারকাত ২০১৪ সালের এক লোক বক্তৃতায় Rent Seekers এর কথা উল্লেখ করেছেন । আমাদের সমাজে দুর্নীতিবাজ, চাঁদাবাজ, ছিনতাইকারী, দখলবাজ, লুটেরা, কালোবাজারী, প্রতারক, দালাল যারা অনৈতিকভাবে অর্থ উপার্জন করে রাতারাতি বিপুল অর্থ বিত্তের মালিক বনে যায় তাদেরকে তিনি তাঁর লোক বক্তৃতায় Rent Seekers হিসেবে উল্লেখ করেছেন । এই Rent Seeker রা সম্পদ তৈরী করেনা, অন্যের সম্পদ হরণ করে সম্পদের পাহাড় গড়ে তোলে । এই Rent Seekers তৈরী হওয়ার প্রধান কারণ বাণিজ্যিক দৃষ্টিভঙ্গির প্রসার ।

বাণিজ্যিক দৃষ্টিভঙ্গির প্রসারমান । আর এটিই বিশ্ববাসীর জন্য এক ভয়াবহ বিপদ সংকেত । এ দৃষ্টিভঙ্গি ব্যাপক ভাবে প্রসারিত হচ্ছে ক্রমশ: । বিশ্ব ব্যাপি ব্যাপক পরিবর্তন পরিলক্ষিত হচ্ছে । যাকে আমরা উন্নয়ন বলে চলছি । কিন্তু এ উন্নয়ন এক পেশে । মানুষের মানবিক গুণগুলোকে বিসর্জন দিয়ে, উপেক্ষা করে এ উন্নয়ন হচ্ছে । প্রকৃত বিবেচনায় এটি কোন উন্নয়নই নয় ।

আজকের বিশ্বায়ন ধারণাটি বাণিজ্যতন্ত্রের চরম বিকাশমান রূপ । বর্তমান বিশ্ব বাস্তবতায় উন্নত অনুন্নত কোন দেশই বিশ্বায়ন প্রক্রিয়ার বাইরে নয় । বিশ্বায়ন প্রক্রিয়ায় যুক্ত হয়ে দরিদ্র দেশগুলো এগিয়ে যাওয়ার নিরন্তর চেষ্টা করে চলছে । কিন্তু বিশ্বায়নের চ্যালেঞ্জ মোকাবেলার যে প্রস্তুতি বা যে কাঠামোগত অবস্থান থাকা বাঞ্ছনীয়, তা না থাকায় দরিদ্র দেশগুলোতে টেকসই উন্নয়ন নিশ্চিত হবে বলে মনে হচ্ছেনা । আর দরিদ্র দেশ গুলোতে টেকসই উন্নয়ন নিশ্চিত না হলে বিশ্ব ব্যাপি টেকসই উন্নয়ন নিশ্চিত করার চিন্তা অযৌক্তিক । আমাদের দেশের তথ্য প্রযুক্তি উন্নয়নের কথাই বলি । বিবেচনা

করি বাংলাদেশ ব্যাংকের রিজার্ভ চুরির বিষয়টি। গত ৪ ফেব্রুয়ারি, ২০১৬ তারিখে রিজার্ভের অর্থ চুরি হয়। ২৯ ফেব্রুয়ারি, ২০১৬ তারিখে ফিলিপাইনের ইনকোয়ার নামক পত্রিকায় এ বিষয়ে প্রথম প্রতিবেদন প্রকাশিত হয়। এত বড় একটি ঘটনা বাংলাদেশ ব্যাংক কর্তৃপক্ষ ধামাচাপা দেওয়ার চেষ্টা করে। ফিলিপাইনের পত্রিকার বদৌলতে বিষয়টি জানাজানি হয়। তথ্য গোপন করার পরিণতিতে গভর্নর আতিউর রহমান ১৫ মার্চ, ২০১৬ তারিখে পদ ত্যাগ করতে বাধ্য হন। তদন্তের জন্য বাংলাদেশের সিআইডি, এফবি সহ বেশ কয়টি সংস্থা কাজ করে। সাবেক গভর্নর ফরাস উদ্দিনের নেতৃত্বে একটি তদন্ত কমিশন গঠন করা হয়। ব্যাংক কর্তৃপক্ষ এ ঘটনার জন্য সুইফটকে দায়ী করে। সুইফট তা অস্বীকার করে উল্টো বলেছে, এতে বাংলাদেশ ব্যাংক কর্মকর্তারা জড়িত। বাংলাদেশ ব্যাংকের কয়েকজন কর্মকর্তাকে জিজ্ঞাসাবাদ করা হয়, বরখাস্ত করা হয় কয়েক জনকে। তার মানে বিভ্রান্তি কাকে বলে? আরো আশ্চর্যজনক তথ্য হলো ঘটনা ঘটার দশ মাসের অধিক সময় পরে তৎকালীন গভর্নর ড. আতিউর রহমানকে জিজ্ঞাসাবাদ করা হয়। বাংলাদেশ ব্যাংকের মত সুরক্ষিত জায়গা থেকে অর্থ চুরির ঘটনা অত্যন্ত লজ্জাজনক, অপমান, অবমাননাকর। এতে এদেশের জনস্বার্থকে উপেক্ষা করা হয়েছে। এখানে সন্দেহ পোষণ করার কোন সুযোগ নেই। যে যার মত করে কথা বলে চলছে। রসিকতা নয় কি? এঘটনায় প্রমাণ হয় প্রযুক্তি জ্ঞানে আমরা এগিয়ে যাচ্ছি। নৈতিকতায় নয়। নৈতিকতা ব্যতিরেকে জ্ঞান বিজ্ঞান বা তথ্য প্রযুক্তির উন্নয়ন মানুষের জন্য কোন সুফল বয়ে আনতে পারেনা। রিজার্ভের অর্থ চুরির ঘটনা বলে দেয়, আমরা বিশ্বায়নের যাঁতাকলে পিষ্ট হচ্ছি- এভাবে চলতে থাকলে আগামী কয়েক দশকের মধ্যে আমাদের মত দরিদ্র দেশ গুলোতে কোন সুস্থ ধারার রাজনীতি থাকবে বলে মনে হয়না। সুশীল সমাজ, গণমাধ্যম, আইন, শিক্ষা সবই বিশ্বায়নের পদতলে অবদমিত হতে থাকবে। সত্য উৎখাটন কঠিন হয়ে উঠবে। আজকের যুগে বিশ্বায়ন বাণিজ্য তন্ত্রের শিকলে বন্দি হয়ে টেকসই উন্নয়নের কথা বলে উন্নয়ন ধারনাকে মূলত: বিভ্রান্ত করে দিচ্ছে। বিশ্বায়নের গতিপ্রকৃতি তাই জানান দিচ্ছে।

বিশ্বায়ন প্রক্রিয়ার সুফল পেতে হলে বিশ্ব নেতাদের বিশ্ববাসীর প্রতি প্রতিশ্রুতি ও দায়বদ্ধতা থাকা চাই। বিশ্বের সবচেয়ে ধনী রাষ্ট্রের রাষ্ট্রনায়ককে দরিদ্র দেশগুলোর অভুক্ত মানুষদের প্রতি যে দরদ, মমত্ববোধ থাকা প্রয়োজন তা আছে কি? সবচেয়ে ক্ষমতাধর দেশের রাষ্ট্রনায়কের দরিদ্র দেশগুলোর প্রতি যে প্রতিশ্রুতি দায়বদ্ধতা থাকা বাঞ্ছনীয় তা দেখতে পারছি কি? বাস্তবে দায়বদ্ধতার বিপরীতে প্রতিহিংসা চরিতার্থ করতে দেখছি। হতাশাজনক সত্য দিন যতই যাচ্ছে বিশ্ব ব্যাপি দরিদ্র শ্রমজীবী সাধারণ মানুষের দুর্দশা বেড়েই চলছে। সারা বিশ্বে নিরাপত্তা সমস্যাটি দিন দিন প্রকট আকার ধারণ করছে। বাণিজ্যিক স্বার্থ সিদ্ধি রয়েছে এর মূলে। উন্নত দেশগুলোর বাণিজ্যিক স্বার্থ উদ্ধারের নেশাই দেশে দেশে কোটি কোটি মানুষ চরম আতংক, উদ্বেগ, উৎকণ্ঠায় দিন কাটাতে হচ্ছে। নয়/এগারর পর সন্তাসবাদ উন্নত দেশগুলোর জন্য চরম হুমকি বলে প্রচারনা চালানো হচ্ছে। বস্তুত এই সন্তাসবাদ অনুন্নত দরিদ্র দেশগুলোর জন্য ভয়াবহ পরিণতি বয়ে আনছে। নয় কি?

বাণিজ্যিক দৃষ্টিভঙ্গি আজ এমনভাবে প্রতিষ্ঠিত যে, একজন মানুষ অর্থ উপার্জন করে কী করছে মানুষ তাইই দেখে। কাড়ি কাড়ি অর্থের বদৌলতে সমাজে রাতারাতি অবস্থান তৈরী করা যায়, প্রতিষ্ঠিত হওয়া যায় সহজেই। কি উপায়ে উপার্জন করে সমাজ তা পরখ করেনা। এ সংস্কৃতি প্রসারের ফলে বিশ্ব ব্যাপি অস্তিত্ব বেড়েই চলছে। জ্যামিতিক হারের চেয়ে বেশী হারে বেড়ে চলছে বৈষম্য, শোষণ, বঞ্চনা। এ বঞ্চনার শেষ কোথায়- কেউ বলতে পারে বলে মনে হয়না। বাণিজ্যিক দৃষ্টিভঙ্গির ভেরাজালে কূটনীতি দিনে দিনে দুর্বোধ ও জটিল হয়ে পড়ছে। কূটনীতির জটিলতার কঠোর সমীকরণে পড়ে তৃতীয় বিশ্বের উন্নয়ন থমকে আছে। তৈরী হচ্ছে জটিল জটিল সমস্যা। সমস্যা থেকে সংকট। আজকের বিশ্বকে আলাদা আলাদা ভাবে দেখলে অজস্র সংকট চোখে পড়ে। আর এককভাবে বিবেচনা করলে পৃথিবীতে সংকট একটিই, আর তা হলো বাণিজ্যিক দৃষ্টিভঙ্গির প্রসার। আরো সহজ করে বলা যায়, সকল সংকটের কেন্দ্র বিন্দু হলো বাণিজ্যিক দৃষ্টিভঙ্গি। পৃথিবীতে সকল সময়েই সংকট ছিল। সংকট থেকে মুক্তিও মিলছে। কিন্তু আগে কোন সময়েই সংকটের মূলে বাণিজ্যিক

স্বার্থ ছিল বলা যাবেনা। আজকের যুগে বাণিজ্যিক স্বার্থে যুদ্ধ পরিচালিত হচ্ছে। তার মানে দাঁড়ায়, এ যুগে যুদ্ধও এক ধরনের পরিকল্পিত বিনিয়োগ। বাণিজ্যিক স্বার্থের মোড়কে আবদ্ধ এই সংকট থেকে বিশ্ববাসীর মুক্তির উপায় কী? কিংবা এই সংকট থেকে আদৌ মুক্তি মিলবে কি? বলা মুশকিল।

কেবল লাগামহীন মুনাফা অর্জন একজন ব্যবসায়ীর মূল লক্ষ্য হওয়া উচিত নয়। মুনাফা লাভের পাশাপাশি মানুষের প্রতি দায়বদ্ধতা থাকাও জরুরী। তেমনি একজন শিল্প মালিকের শ্রমিকদের প্রতি দায়িত্ববোধ ও দায়বদ্ধতা থাকা বাঞ্ছনীয়। পেটের দায়ে শ্রমিকেরা তার কারখানায় কাজ করে। সেই শ্রমিকের জীবন মান উন্নয়ন তথা তাদের ছেলে মেয়েদের শিক্ষা, স্বাস্থ্যের অধিকার নিশ্চিত করার দিকে খেয়াল দেওয়া উচিত। জ্ঞান ও ন্যায় ভিত্তিক সমাজ প্রতিষ্ঠা করতে চাইলে আমাদের মনোভাব তাইই হতে হবে। প্রশ্ন হলো এক দিকে মুনাফা, আরেক দিকে দায়বদ্ধতা- বাণিজ্যিক দৃষ্টিভঙ্গি আমাদের কোন দিকে প্ররোচিত করে? নিশ্চয়ই মুনাফার দিকে।

সুতরাং কেবল বাণিজ্যিক দৃষ্টিভঙ্গির প্রসার মানুষের কল্যাণ সাধন করার কথা নয়। কল্যাণ একটি গুণগত ধারণা। এ যুগে প্রতিটি রাষ্ট্রই কল্যাণ রাষ্ট্র হিসেবে প্রতিষ্ঠা পেতে চায়। প্রতিটি রাষ্ট্রই নিজের উন্নয়নকে টেকসই উন্নয়ন হিসেবে প্রতিষ্ঠা করতে চায়। কিন্তু প্রকৃত বিবেচনায় তা করতে পারছে কি? মানুষের প্রকৃত কল্যাণ নিশ্চিত করতে চাইলে মানবিক দৃষ্টিভঙ্গির প্রসার ঘটতে হবে। বর্তমান বিশ্ব বাস্তবতায় মানবিকতাকে বিসর্জন দিয়ে বাণিজ্যিক দৃষ্টিভঙ্গির প্রসারের যে নিরন্তর প্রচেষ্টা তা থেকে সম্পূর্ণ বেরিয়ে আসতে হবে। আগে মানবিক দৃষ্টিভঙ্গিকে প্রতিষ্ঠিত করতে হবে। তারপর বাণিজ্যিকতার কথা ভাবতে হবে। তবেই গণমানুষের মঙ্গল। তবেই দেশ ও জাতির কল্যাণ। তবেই প্রকৃত ও টেকসই উন্নয়ন।

আলোচ্য প্রবন্ধে বাণিজ্যিক দৃষ্টিভঙ্গির কুফল নিয়ে আলোচনা করার প্রচেষ্টা থাকবে। একই সাথে বিশ্ব মানবতার মুক্তি তথা দরিদ্র, শ্রমজীবী গণমানুষের উন্নতির লক্ষ্যে মানবিক দৃষ্টিভঙ্গির প্রসারের গুরুত্বের ওপর আলোকপাত করার প্রয়াস থাকবে।

২. লক্ষ্য ও উদ্দেশ্য :

আলোচ্য প্রবন্ধের মূল লক্ষ্য হলো বাণিজ্যিক দৃষ্টিভঙ্গির প্রসারের মধ্য দিয়ে আজকে যে উন্নয়নের কথা আমরা বলছি তার স্বরূপ উন্মোচন করা। একই সাথে টেকসই ও কাঙ্ক্ষিত উন্নয়নে মানবিক দৃষ্টিভঙ্গির প্রসারের প্রয়োজনীয়তার কথা তুলে ধরা। আর এলক্ষ্যকে সামনে রেখে উদ্দেশ্য গুলো নিম্নে উপস্থাপন করা হলো :

১. আধুনিক বাণিজ্যিক দৃষ্টিভঙ্গির প্রসারের উৎস খুঁজে বের করা।

২. বাণিজ্যিক দৃষ্টিভঙ্গির প্রসারের ফলে বিশ্ব বাস্তবতায় নেতিবাচক দিকগুলোর ওপর আলোকপাত করা।

৩. প্রকৃত ও টেকসই উন্নয়নে মানবিক দৃষ্টিভঙ্গি প্রসারের গুরুত্ব তুলে ধরা।

৩. তথ্য ও পদ্ধতি :

আলোচ্য প্রবন্ধে ব্যবহৃত তথ্য সমূহ মাধ্যমিক উৎস হতে নেয়া হয়েছে। বাংলাদেশ অর্থনৈতিক সমীক্ষা, বাংলাদেশ অর্থনীতির সমিতি কর্তৃক প্রকাশিত জার্নাল, বিভিন্ন গ্রন্থ, বাংলাদেশ এশিয়াটিক সোসাইটি কর্তৃক প্রকাশিত বাংলাপিডিয়া, ইন্টারনেট, বিভিন্ন দৈনিকে প্রকাশিত বিভিন্ন প্রতিবেদন ও প্রবন্ধের সহায়তা নেয়া হয়েছে। এ ছাড়া সামগ্রিক পরিস্থিতির উপর লেখকের অভিজ্ঞতার আলোকে লব্ধ কতিপয় পর্যবেক্ষণের ওপর আলোকপাত করা হয়েছে।

৪. আধুনিক বাণিজ্যিক দৃষ্টিভঙ্গির উৎপত্তি এবং প্রসার :

আধুনিক বাণিজ্যিক দৃষ্টিভঙ্গির যে রূপ বিশ্ব ব্যাপি দেখে চলছি তা কখন কোথায় কিভাবে উৎপত্তি লাভ করেছে তা নির্দিষ্ট করে বলা মুশকিল। সমাজ সব সময়ই পরিবর্তনশীল। এই পরিবর্তনের কোন পর্যায়ে তার ভিত রচিত হয় তা সুনির্দিষ্ট করে বলার সুযোগ নেই। বাণিজ্যিকতা, বাণিজ্যিক স্বার্থ সব সময়ে সব সমাজেই ছিল। ১৪৯২ সালের কলম্বাসের আমেরিকা আবিষ্কার বিশ্ব পরিবর্তনে গতি সঞ্চর করে। পৃথিবী সৃষ্টির শুরু থেকে ১৪৯২ সাল পর্যন্ত পৃথিবী পরিবর্তিত হয়েছে ধীর গতিতে। কিন্তু ১৪৯২ সাল হতে বর্তমান পর্যন্ত এই ৫০০ বছরের পরিবর্তন হয়েছে বৈপ্লবিক হারে যা অকল্পনীয়, নজিরবিহীন।

এই সময়ের মধ্যে ধ্যান-ধারণা, শিক্ষা, জ্ঞান-বিজ্ঞান, প্রযুক্তির উন্নয়ন সহ সকল ক্ষেত্রে ব্যাপক পরিবর্তন হয়েছে। সময়ের সাথে পাল্লা দিয়ে এই পরিবর্তনের গতি আরো দ্রুততর হচ্ছে। কলম্বাসের আমেরিকা আবিষ্কারের পেছনে কেবল বাণিজ্যিক উদ্দেশ্য ছিল বলা যাবেনা। কিন্তু তার এই আবিষ্কার ইউরোপীয় বেনিয়াদের নতুন দিগন্ত খুলে দেয়। ইউরোপীয় বণিক সমাজ সমাজ সমুদ্র জয়ের নেশায় মেতে উঠে। অল্প সময়ের ব্যবধানেই সমুদ্র পথে সারা বিশ্ব ব্যাপি বাণিজ্য শুরু করে দেয়। আধুনিক নামধারী বাণিজ্যিক দৃষ্টিভঙ্গির সূচনা সম্ভবত এখান থেকেই। এই বাণিজ্যিক দৃষ্টিভঙ্গির ওপর ভর করে পৃথিবীতে ব্যাপক উন্নয়ন সাধন হয়েছে বলা হচ্ছে। কিন্তু এ উন্নয়নের বুকে রয়েছে এক বিরাট ভয়ানক ক্ষত। আর এ ক্ষত পৃথিবীব্যাপি প্রকৃত উন্নয়নের পথে হিমালয়ের মত বাঁধা হয়ে দাঁড়িয়েছে।

পৃথিবীতে অগণিত আইন প্রণীত হয়েছে, হচ্ছে। আইন প্রণীত হবে গণ মানুষের স্বার্থে, গণমানুষের কল্যাণ সাধনের নিমিত্তে। তাত্ত্বিকভাবে জনস্বার্থে আইন প্রণীত হচ্ছে বলা হলেও সকল ক্ষেত্রে তা হচ্ছে কি? বাংলাদেশের কথাই বিবেচনা করি। এদেশের সকল আইনে জনস্বার্থ প্রতিফলিত হচ্ছেনা এমন কি জনস্বার্থে বাস্তবায়নের হারও কম। হাই কোর্টে কত শত শত রিট হচ্ছে। প্রশ্ন হলো এত শত শত রিটের মধ্যে দরিদ্র শ্রমজীবী সাধারণ মানুষের স্বার্থে কয়টি রিট হয়?

মানবিক মূল্যবোধকে প্রধান্য দিয়ে বাণিজ্যিক দৃষ্টিভঙ্গির প্রসারিত হলে বিশ্বব্যাপি প্রকৃত উন্নয়ন তথা টেকসই উন্নয়ন নিশ্চিত হতো। কিন্তু বর্তমান বিশ্ব বাস্তবতায় দিকে তাকালে একথা জোর দিয়েই বলা যায় যে, মানবিক মূল্যবোধকে সম্পূর্ণ উপেক্ষা করেই বাণিজ্যিক দৃষ্টিভঙ্গির প্রসার ঘটছে, ঘটে চলছে। ফলে অর্থনৈতিক ক্ষেত্রে ব্যাপক উন্নয়ন সাধিত হলেও সামাজিক সূচকের দিক থেকে বিশ্ব ক্রমাগত পিছিয়ে চলছে। অর্থনৈতিক ও সামাজিক সূচকের ক্ষেত্রে ব্যাপক ফাঁক ও অসামঞ্জস্য সৃষ্টি হচ্ছে। পৃথিবীতে যত সংকট তৈরী হচ্ছে, তার মূলে এই অসামঞ্জস্যতাই দায়ী।

তাহলে কি বাণিজ্যিকতাকে শতভাগ উপেক্ষা করেই মানবিকতন্ত্র প্রতিষ্ঠিত করতে হবে। অবশ্যই না। বাণিজ্যিকতাকে উপেক্ষা করে নয়। বাণিজ্যিকতা ও মানবিকতাকে পাশাপাশি চলতে দিতে হবে। এদুয়ের মধ্যে সামঞ্জস্যতা রেখে উন্নয়নকে প্ররোচিত করতে হবে। নতুন করে উন্নয়নের পথ খুঁজতে হবে যেখানে বাণিজ্যিকতার চেয়ে মানবিকতার গুরুত্ব থাকবে বেশী।

মানব সভ্যতার শুরু থেকে আজ অবধি হাজারো তত্ত্ব পদ্ধতি প্রবর্তিত হয়েছে, বাস্তবায়িত হয়েছে যা সমাজ পরিবর্তনে ভূমিকা রেখেছে। পঞ্চদশ শতাব্দীর শেষ দিক থেকে বাণিজ্যিকতার দাপটে পৃথিবীতে অনেক কার্যকর প্রভাবশালী তত্ত্ব প্রবর্তিত হয়েছে যার ফলে এই কয়েক শতকে পৃথিবীতে বৈপ্লবিক পরিবর্তন সাধিত হয়েছে। ইউরোপের রেনেসা সারা ইউরোপ জুড়ে যে জাগরণ সৃষ্টি করেছে তার ব্যাপকতা সম্পর্কে আমরা জানি। রেনেসার অগ্রদূতগণের কী উদ্দেশ্য ছিল তা

সুনির্দিষ্ট করে বলা যাবেনা হয়ত । তবে এটুকু বলা যায় রেনেসার অগ্রদূতগণ সম্ভবত: একটি সুন্দর, শান্তিময়, বাসযোগ্য পৃথিবী গড়ার প্রত্যয় নিয়ে এর সূত্রপাত করেছিলেন । রেনেসার মূল কথা ছিল মানব কল্যাণ, গণ মানুষের মুক্তি । ইউরোপে প্রতিষ্ঠিত সামন্তবাদের যঁতাকলে পিষ্ট হওয়া গণমানুষের মুক্তির মধ্য দিয়ে এর সূত্রপাত । কিন্তু অচিরেই বাণিজ্যিকতা সে চেতনা গ্রাস করে নেয় । রেনেসার প্রভাব বাণিজ্যিকতার জালে আটকা পড়ে । ভূমি ভিত্তিক সমাজ কাঠামো ভেঙ্গে শিল্প ভিত্তিক সমাজ প্রতিষ্ঠিত হয় । রাজনৈতিক চেতনা বণিক সমাজের ভোগ বিলাসিতার মাধ্যমে পরিণত হয় । বাণিজ্যিক দৃষ্টিভঙ্গি প্রসার লাভ করে এভাবেই । সারা ইউরোপ জুড়ে ব্যাপক পরিবর্তন হয় । মানুষ মানবতাবাদী না হয়ে বাণিজ্যিক স্বার্থে অন্ধ হয়ে ওঠে । বাণিজ্যই হয়ে ওঠে সবকিছুর কেন্দ্রবিন্দু । বাণিজ্যতন্ত্রের কুপ্রভাব কেবল ইউরোপ জুড়ে নয় সারা বিশ্বব্যাপি প্রসারিত হয় । মানুষের মুক্তির জন্য যে চেতনার সূত্রপাত, মানবতার জয় গানের যে জাগরণের প্রসার হতে লাগলো, বাণিজ্যতন্ত্র মুহূর্তেই তা গ্রাস করে ফেললো । কেবল রেনেসার অগ্রযাত্রা নয়, বাণিজ্য তন্ত্রের কাছে পুরো বিশ্ব, বিশ্ব রাজনীতি, দর্শন, শিক্ষা, জ্ঞান বিজ্ঞানের অগ্রযাত্রা আজ শেকল বন্দি ।

১৮৪৮ সালে কমিউনিস্ট ম্যানুফেস্টো উপনিবেশবাদী শক্তির ওপর পদাঘাত করে এবং তার আঘাতে উপনিবেশবাদ ক্ষয়িত হতে থাকে । কমিউনিস্ট ম্যানুফেস্টো প্রকাশের পর পরই বিশ্বব্যাপি উপনিবেশিক শোষণের বিরুদ্ধে রাজনৈতিক চেতনার প্রসার ঘটতে থাকে । দেশে দেশে গড়ে ওঠে রাজনৈতিক দল । এসকল দলের মাধ্যমে মানুষের মধ্যে স্বাধীনতার চেতনা জাগ্রত হয় এবং দেশে দেশে স্বাধীনতার আন্দোলন গড়ে ওঠে । পরিণতিতে উপনিবেশবাদের পতন ঘটতে থাকে । একের পর এক দেশ স্বাধীন হতে থাকে ।

১৯২০ এর দশকের শেষ ভাগে মহামন্দা মোকাবেলায় সামষ্টিক অর্থনীতির সূত্রপাত হয় যা মন্দার কবল থেকে বিশ্ব অর্থনীতিকে মুক্ত করতে সক্ষম হয় । এভাবে হাজারো তত্ত্ব, পদ্ধতি, নিয়ম-বিধি, আইন, যুদ্ধ-বিগ্রহ পৃথিবীতে ব্যাপক পরিবর্তন সাধন করে চলছে । অর্থনীতিতে উৎপাদন সর্বোচ্চকরণ তত্ত্ব বাদ দিয়ে যখনই মুনাফা সর্বোচ্চকরণ তত্ত্ব গ্রহণ করা হয় তখন থেকেই বিশ্ব মানবতা, মানবিকতা, মনুষ্যত্ববোধের পতন ঘটতে থাকে । আজকের সময়ে যা শূণ্যের কোটায় । সুতরাং মানবিক দৃষ্টিভঙ্গির বিবেচনায় মুনাফা সর্বোচ্চকরণ তত্ত্ব আজ চরম বিতর্কের মুখোমুখী । বাণিজ্যিক দৃষ্টিভঙ্গির পরিপূর্ণতা দিতেই মুনাফা সর্বোচ্চকরণ তত্ত্বের উদ্ভব । এই মুনাফা সর্বোচ্চকরণের জন্য বিক্রোতা/উৎপাদনকারীরা কি না করে চলছে । অসম প্রতিযোগিতা, অনৈতিক কার্যকলাপ, উৎপাদন নিয়ন্ত্রণ করা, দাম বাড়ানো, ভেজাল পণ্য উৎপাদন, সিন্ডিকেট, শ্রমিকদের ন্যায্য মজুরি থেকে বঞ্চিত করা, শোষণ, নিপিড়ন সহ এমন কোন অপকর্ম নেই যা মুনাফা সর্বোচ্চ করতে বিশ্ব ব্যাপি ঘটছেনা । বাণিজ্যিক দৃষ্টিভঙ্গির সর্বগ্রাসী রূপ আজ মুনাফা সর্বোচ্চকরণ তত্ত্বের গ্রহণযোগ্যতাকে প্রশ্নবিদ্ধ করে তুলছে ।

৫. বাণিজ্যিক দৃষ্টিভঙ্গির নেতিবাচক দিক :

সমাজের সাধারণ মানুষেরা সহজ সরল, নিরীহ । এরা অন্যের ক্ষতি করতে আগ্রহী নয়, কঠোর পরিশ্রম করে, দিন রাত শরীরের ঘাম ঝড়িয়ে যাচ্ছে । দুঃখজনক সত্য এই শ্রমজীবী সাধারণ মানুষেরা স্বচ্ছল ভাবে জীবন যাপন করতে পারছেননা । সারা পৃথিবী ব্যাপি এই একই চিত্র । কতিপয় মানুষ বুদ্ধির জোরে অন্যের অধিকার হরণ করে বিলাসী জীবন যাপন নিশ্চিত করছে । রাষ্ট্র, আইন, সরকার, সমাজ, সবই এই অল্প সংখ্যক দুর্বৃত্তদের পক্ষে । পৃথিবীর সংখ্যা গরিষ্ঠ নিরীহ মানুষের আর্থ-সামাজিক অবস্থার উন্নয়নের দিকে কেউ তাকায়না । বাণিজ্যতন্ত্রের প্রকৃত শিক্ষা এটাই ।

বাণিজ্যিক দৃষ্টিভঙ্গি মানুষের ধ্যান ধারণাকে অর্থ কেন্দ্রিক করে তোলে যা অনৈতিক ও অযৌক্তিক । আজ বিশ্বব্যাপি যে অজস্র সংকট তৈরী হচ্ছে তার প্রধান কারণ এই বাণিজ্যিক দৃষ্টিভঙ্গির প্রসার ।

বাণিজ্যিক দৃষ্টিভঙ্গি মানুষের সুষ্ঠু চিন্তা বিকাশের এক বিরাট বাঁধা। মানুষের মেধা ও মননে এক ভয়ানক প্রতিবন্ধক। এক কথায় বাণিজ্যিক দৃষ্টিভঙ্গি মানব কল্যাণ ব্যাহত করে, ক্ষতিগ্রস্ত করে। শিক্ষিত মানুষ মানে আলোকিত একজন মানুষ। একজন শিক্ষিত মানুষকে হওয়া চাই সৎ, আদর্শ ও সুবিবেচক নাগরিক। অসংখ্য শিক্ষিত মানুষ এদেশের প্রশাসন, রাজনীতি, গণমাধ্যম সহ সকল ক্ষেত্রে বিভিন্ন গুরুত্বপূর্ণ দায়িত্ব পালন করছে। প্রশ্ন হলো কয়জন শিক্ষিত মানুষ বুকে হাত দিয়ে বলতে পারবে যে, তিনি শতভাগ সৎ। একথা প্রব সত্য যে, উন্নয়নের জন্য শিক্ষার কোন বিকল্প নেই। কিন্তু শিক্ষিত মানুষের নৈতিকতা বিকল্পী, আইন বহির্ভূত, বিবেক বর্জিত কার্যকলাপ দেখে হতাশ হতে হয়। শিক্ষিত সমাজের একটি অংশের অর্থের মোহ, জালিয়াতি, অনিয়ম, অনাচার, দুর্নীতি দেখে হতবাক হয়ে যেতে হয়। বাংলাদেশের জনপ্রশাসনের একজন কর্মকর্তার কথা বিবেচনা করা যাক। জন প্রশাসনের একজন কর্মকর্তা প্রজাতন্ত্রের একজন কর্মচারী হিসেবে নিয়োগ প্রাপ্ত হন জন স্বার্থে, জনগনের জান মালের নিরাপত্তা, আর্থ-সামাজিক অবস্থা উন্নয়নে নিরলস কাজ করার জন্য। প্রজাতন্ত্রের একজন কর্মচারী হিসেবে এদেশের কয়জন কর্মকর্তা তাদের কার্যক্রমের মাধ্যমে প্রমাণ করছেন যে, তিনি মানুষের জন্য, মানব কল্যাণে নিবেদিত। জনপ্রশাসনের একজন কর্মকর্তার সাথে এদেশের সাধারণ মানুষের ন্যূনতম কোন যোগাযোগ থাকে কি? দুর্নীতি এদেশে এক ভয়াবহ ব্যাধি। বলা হয় এদেশের রাজনীতিবিদ, আমলা, ব্যবসায়ী এই তিন শ্রেণি আকুষ্ঠ দুর্নীতিতে নিমজ্জিত। দুর্নীতি করে রাতারাতি আপুল ফুলে কলা গাছ বনে যান, ক্ষতিগ্রস্ত হয় সাধারণ মানুষ, ক্ষতি গ্রস্ত হয় পুরো দেশ ও জাতি। প্রচলন আছে, একজন দুর্নীতিবাজ এর কাছে মা-বাপ, ভাই-বোন বলে কিছু নেই। সুযোগ পেলে বাবার কাছ থেকেও দুর্নীতি করে। দুর্নীতি দেশের উন্নয়নকে অবরুদ্ধ করে রাখছে। এদেশে অর্থনৈতিক ও সামাজিক অবকাঠামো উন্নয়নে প্রতি বছর বিপুল অংকের অর্থ ব্যয় করা হয়। গত ১০১৬-২০১৭ অর্থ বছরে বার্ষিক উন্নয়ন কর্মসূচীর জন্য বরাদ্দ ছিল ১,১০,৭০০ কোটি টাকা। এ বিপুল পরিমাণ অর্থ উন্নয়নে ভারসাম্য ও উচ্চ প্রবৃদ্ধি অর্জনের কথা বলে ব্যয়িত হলেও বাস্তবে এ অর্থের সিংহভাগ রাজনীতিবিদ, আমলা, ব্যবসায়ী, ছাত্রনেতা, টিকাদার, জনপ্রতিনিধিদের পকেটে চলে যাচ্ছে। যেন দেখার কেউ নেই। দরিদ্র মানুষের আর্থ-সামাজিক উন্নয়ন তথা ভাগ্য উন্নয়নের কথা বলে প্রতি বছর সামাজিক নিরাপত্তা বেষ্টনির অসংখ্য কর্মসূচী বাস্তবায়িত হচ্ছে। গত ২০১৫-২০১৬ অর্থ বছরে এ খাতে বরাদ্দ ছিল ৩৭,৫৪৬ কোটি টাকা যা মোট বাজেটের ১২.৭২ শতাংশ এবং জিডিপি ২.১৯ শতাংশ। এসকল কর্মসূচীর সামান্য অংশই প্রকৃত সুবিধা ভোগিরা পায়। এসকল বরাদ্দ যত না হয় অবকাঠামোগত উন্নয়ন বা দরিদ্র শ্রমজীবী মানুষের ভাগ্য উন্নয়নে, তার চেয়ে বেশি হয় দুর্নীতি করার জন্য। কেবল বাংলাদেশ নয় দুর্নীতি আজ বিশ্ব ব্যাপি মহামারী আকারে ছড়িয়ে পড়ছে। এর নেপথ্যে রয়েছে বাণিজ্যিক দৃষ্টিভঙ্গি। বাণিজ্যিক দৃষ্টিভঙ্গি বিকাশের ফলেই পৃথিবীব্যাপি দুর্নীতির মহোৎসব। বাণিজ্যিক দৃষ্টিভঙ্গি বিকাশের ফলেই এদেশে একাধিকবার শেয়ার বাজারে কেলেঙ্কারির মত ঘটনা দেখতে হয়। একটি চক্র শেয়ার বাজারে কৃত্রিমভাবে শেয়ারের দাম বাড়িয়ে সাধারণ বিনিয়োগকারীদের নিঃস্ব করে বিপুল পরিমাণ অর্থ হাতিয়ে নেয়। ডেসটির মত প্রতিষ্ঠান গড়ে ওঠে কত নিখুঁতভাবে মানুষের মগজ ধোলাই করে বোকা বানিয়ে হাজার হাজার কোটি টাকা লুপে নেয়। বাণিজ্যিক দৃষ্টিভঙ্গি বিকাশের ফলেই নির্মাণ কাজে রডের পরিবর্তে বাঁশ ব্যবহার করার মত অদ্ভুদ অনৈতিক ঘটনা ঘটছে। নারায়নগঞ্জের সাত খুনের ঘটনার মত লোমহর্ষক বর্বর ঘটনা সম্পর্কে আমরা সবাই কম বেশী অবহিত। ২০১৪ সালের ২৭ এপ্রিল নারায়নগঞ্জ সিটি কর্পোরেশনের সাবেক প্যানেল মেয়র নজরুল ইসলাম সহ সাত জনকে একসঙ্গে অপহরণ এবং পরে হত্যা করে লাশ গুম করার সাথে র‍্যাব-১১ এর অধিনায়ক, র‍্যাব -১১ এর উপ - অধিনায়ক, র‍্যাব - ১১ এর সিপিসি সহ পুরো একটি ইউনিট সম্পৃক্ত হয়ে পরে। ১৬ জানুয়ারি, ২০১৭ ইং তারিখে এই মামলার রায়ে আলোচিত সাত খুনের ঘটনায় প্রতিরক্ষা বাহিনীর সদস্যদের সংশ্লিষ্টতাকে ‘ জাতির জন্য অত্যন্ত কলঙ্কজনক ’, ‘ সকল সরকারি কর্মচারীর জন্য লজ্জাজনক ’ বলে উল্লেখ করেছেন আদালত। ‘ এ ঘটনা আমাদের সকলের মাথা লজ্জায় নুইয়ে দিয়েছে ’ উল্লেখ করে রায়ের পর্যবেক্ষণে আদালত বলেছেন, নূর হোসেন এর মূল পরিকল্পনাকারী (মাস্টারমাইন্ড)। র‍্যাব সদস্যরা তাঁর সঙ্গে মিলে যৌথভাবে (জয়েন্ট ভেঞ্চার) এই অপরাধ ঘটিয়েছেন (প্রথম আলো, ২৩ জানুয়ারি, ২০১৭)। এই কলঙ্কজনক ঘটনার মূল কারণ কী? এক কথায় এর উত্তর অর্থের প্রতি মোহ। কেবল অর্থের মোহে পড়ে নূর হোসেনের মত একজন আপাদমস্তক দুর্বৃত্তের কাছে র‍্যাবের একটি পুরো ইউনিট বিক্রি হয়ে যায়। সত্যি অর্থের মোহে পড়ে মানুষ কী না করতে পারে?

ইউরোপীয় বেনিয়ারা দেশের পর দেশ দখল করে ঐসকল দেশের সম্পদ লুণ্ঠন করে নিতে থাকে। বাণিজ্যের উদ্দেশ্যে সংগঠিত কোম্পানী দকলকৃত দেশগুলোর উপর প্রবল প্রতাপশালী রাজনৈতিক দলে রূপান্তরিত হয়। ফলে ঐসকল দেশে

তারা বাণিজ্যিক স্বার্থে লুণ্ঠনের সাংস্কৃতি চালু করে। লুণ্ঠনের এই সাংস্কৃতি সহজতর করতে অর্থের প্রচলন করে অর্থকে জনপ্রিয় করে তোলে। অর্থের প্রচলন করে সম্পদ লুণ্ঠনের সাথে সাথে অর্থ লুণ্ঠন শুরু করতে থাকে। সম্পদ, অর্থ লুণ্ঠন করেই ক্ষান্ত হয়নি। বাণিজ্যিক স্বার্থ সর্বোচ্চকরণ করতে এর পাশাপাশি তথ্য লুণ্ঠন শুরু করে। কোন দেশের কত আয়তন, জনসংখ্যা, সমাজ কাঠামো, কৃষ্টি-সংস্কৃতি, মানুষের ধ্যান ধারণা সহ কোথায় কী সম্পদ আছে সব ধরনের তথ্য লুণ্ঠন করে নিতে থাকে। আর এসকল তথ্যের উপর তাদের পররাষ্ট্রনীতি, কূটনীতি টেলে সাজায়। কুটবুদ্ধির জালে বন্দি হয়ে কূটনীতি প্রতিষ্ঠিত হয়। ফলে হাতছাড়া হয়ে গেলেও দখলকৃত দেশ গুলো ওপর প্রভাব প্রতিপত্তি তেমনি রয়ে গেছে যা দ্বারা তাদের সম্পদ, অর্থ, তথ্য লুণ্ঠন করে চলছে এখনো। চরম সত্য হলো উন্নত বিশ্ব জুড়ে আজকে যে সমৃদ্ধির অর্থনীতি দেখে আমরা অভিভূত হই প্রকৃত অর্থে সেটি লুণ্ঠনের অর্থনীতি। সারা বিশ্বের সম্পদ, অর্থ, তথ্য লুণ্ঠন করে তাদের সমৃদ্ধির সোপান তৈরী করছে।

বাণিজ্যিক দৃষ্টিভঙ্গির প্রসারের ফলেই উচ্চ শিক্ষায় আজ ইতিহাস, ললিতকলা, সাহিত্য, দর্শনের মত ধ্রুপদী বিষয়গুলোর কদর কমে যাচ্ছে। উচ্চ শিক্ষায় এখন বাণিজ্য নির্ভর বিষয়গুলোর জয় জয়কার। তরুণরা বাণিজ্য কিভাবে করতে হয় শিখবে। কিভাবে মুনাফা সর্বোচ্চ করা যায়? গেইম থিউরির মত ধারণাগুলো শিক্ষাই তাদের প্রধান কাজ। ললিতকলা, ইতিহাস, দর্শন, সাহিত্য চর্চা তাদের কাছে গুরুত্বহীন, অসার। যেভাবেই বিবেচনা করি না কেন যে কোন বাণিজ্য শুরু হয় মিথ্যা দিয়ে। আর এ মিথ্যা শিক্ষা দিয়ে শিক্ষার নামে প্রকৃত অর্থে তরুণদের বিপথগামী করা হচ্ছে। সঙ্গত কারণেই মানুষের মেধা মনন আজ সৃজনশীল না হয়ে বরং ছলনার আশ্রয় নিয়ে কিভাবে আয়েশী দিন যাপন করা যায় সেদিকেই বেশি ধাবিত হচ্ছে। এই উপমহাদেশের সঙ্গীতঙ্গনের দিকে তাকালেই এর সত্যতা মিলবে। বর্তমানে কত সঙ্গীত শিল্পিই না জন্ম হচ্ছে। কিন্তু এদের কোন একজনকে ষাটের দশকের শিল্পির সাথে তুলনা করা যাবে কি? এ যুগের একজন শিশুর মধ্যে সংগীত প্রতিভা দেখলেই গান গেয়ে কিভাবে অর্থ বিত্তের মালিক হওয়া যায় সে চিন্তায় মা-বাবা বিভোর হয়ে যায়। এতে তার শিল্পসত্তা লোপ পেতে থাকে। একজন সংগীত শিল্পির গানের প্রতি অনুরাগ, দরদ, মমত্ববোধ থাকা বাঞ্ছনীয়। অর্থ উপার্জনের নেশা তা ধ্বংস করে দেয়। ফলে ষাটের দশকের শিল্পির মত শিল্পি এ যুগে সৃষ্টি হচ্ছেনা। এর জন্য দায়ী বাণিজ্যিক দৃষ্টিভঙ্গিই।

সমাজের জন্য কিছু করতে চাইলে একজন মানুষকে ভালো মানুষ হতে হবে। একজন প্রশাসক, ব্যবসায়ী, রাজনীতিবিদ সহ যে কোন পেশার একজন মানুষ যত দক্ষই হোকনা কেন ভালো মানুষ না হলে তার দক্ষতা ও যোগ্যতা দিয়ে দেশ ও মানুষের জন্য কিছু করতে পারেনা। পরিতাপের বিষয় মানুষের কল্যাণের সাধনে অযোগ্য এই মানুষগুলোই আমাদের সমাজে দক্ষ মানব সম্পদ হিসেবে স্বীকৃত। আমাদের দেশে যা দেখছি একজন ডাক্তার প্রতিষ্ঠিত হয়ে উচ্চ বিত্তের স্বাস্থ্য সেবা প্রদান করতে চায়। কেননা উচ্চ বিত্তের কাছ থেকে সহজে অধিক ফি আদায় করা যায়। পরম মমতার সাথে সাধারণ মানুষের জন্য স্বাস্থ্য সেবা প্রদান করে এমন তো দেখা যায়না। উল্টো সাধারণ মানুষ স্বাস্থ্য সেবা পাওয়ার নামে অবহেলিত হয়, উপেক্ষিত হয়। একই কথা অন্য পেশাজীবির বেলায়ও প্রযোজ্য। এটি বাণিজ্যিক দৃষ্টিভঙ্গি প্রসারের ফল। বাণিজ্যিক দৃষ্টিভঙ্গি মানুষকে দক্ষ করে গড়ে তোলতে প্ররোচিত করে। সৎ, প্রতিশ্রুতিশীল, দায়িত্বশীল ও ভালো মানুষ হিসেবে নয়। মানুষকে নিজের জন্য পরিবারের জন্য পরিশ্রমী হতে উদ্ভুদ্ধ করে। দেশ ও সমাজের জন্য নয়।

বাণিজ্যিক দৃষ্টিভঙ্গি মানুষকে এমনভাবে প্ররোচিত করে যে, সে সব কিছুই অর্থের মানদণ্ডে বিবেচনা করে। অর্থই সব। মান- মর্যাদা, আভিজাত্য সবই অর্থের মাধ্যমে নিরূপিত। মানুষের সততা, নীতি-নৈতিকতা, বিবেক-বিবেচনাবোধ সব তুচ্ছ। ২৪ ফেব্রুয়ারি, ২০১৬ সমকাল পত্রিকার প্রথম পাতায় “ ওয়াসার প্রকল্পে ব্যাপক নয়ছয় : ২০০ কোটি টাকার সুফল পায়নি রাজধানীবাসী ” শিরোনামে একটি প্রতিবেদন প্রকাশিত হয়। এতে ঢাকা মহানগরীর জলাবদ্ধতা দূর করার লক্ষ্যে গৃহিত ২০০ কোটি টাকার প্রকল্পে ব্যাপক অনিয়মের কথা তুলে ধরা হয়। এতে উল্লেখ করা হয়, এ প্রকল্পে সময় ও ব্যয়

দুটোই বাড়ানো হয় নিয়ম বহির্ভূতভাবে। ১১ টি প্যাকেজ দরপত্র আহবানের কথা থাকলেও ২০০ টি কার্যাদেশ দিয়ে ঠিকাদারদের সঙ্গে মিলে সরকারি প্রকল্পের অর্থ নয়ছয় করা হয়। কমপক্ষে ৮০টি ঠিকাদারি প্রতিষ্ঠানের নামে অর্থ ছাড় করা হয় কার্যাদেশের চেয়ে বেশি। দরপত্র ছাড়াই সরাসরি কয়েকটিকে কাজ দেওয়া হয়। কাজ শেষ হওয়ার আগেই বিল দেওয়া হয়। প্রকল্প এলাকায় পাঁচ কিলোমিটার পাইপ ত্রয় ও স্থাপন করার কথা থাকলেও তা শেষ না করেই কাজ শেষ করা হয়। ১ হেক্টর ভূমি অধিগ্রহণের কথা থাকলেও অধিগ্রহণ করা হয় মাত্র দশমিক ৩৪ হেক্টর। সম্প্রতি প্রথম আলো পত্রিকায় “টাকা গুনে গুনে পকেটে নিলেন পুলিশ কর্মকর্তা” শিরোনামে এক প্রতিবেদনে পুলিশের অপরাধ তদন্ত বিভাগের ওবায়দুর রহমান নামের একজন উপ পরিদর্শক অপহরন মামলায় জড়ানো মো: মাসুম নামের একজনের কাছ থেকে কিভাবে দফায় দফায় টাকা আদায় করছেন তা উল্লেখ করা হয়। ২০১৫ সালের ২০ ডিসেম্বরে সাভারের আশুলিয়ায় শেখ শাওন নামের সাড়ে চার বছরের এক শিশু নিখোঁজ হয়। মো: মাসুম নামের ঐ ব্যক্তিকে আসামী করে ২০১৬ সালের ১২ মার্চ আশুলিয়া থানায় একটি অপহরন মামলা দায়ের করা হয়। ওবায়দুর রহমান তদন্তকারী কর্মকর্তা নিযুক্ত হলে নিখোঁজ ঐ শিশুর উদ্ধারে কার্যকর উদ্যোগ গ্রহণ না করে মামলাকে পুঁজি করে অর্থ উপার্জনের পথ বেছে নেয়। নিখোঁজের বাবা শেখ সুমন প্রথমে মাসুমকে অভিযুক্ত করলেও পরে অবস্থান পাল্টায়। কিন্তু ওই কর্মকর্তার হাত থেকে মাসুমের মুক্তি মেলেনি। কলমের খোঁচায় মাসুমকে শেষ করে দেওয়ার হুমকি দিলে মাসুম ওই কর্মকর্তাকে কয়েক দফায় ২ লাখ ২২ হাজার টাকা প্রদান করে। পেশায় ইলেক্ট্রিশিয়ান মাসুম এত টাকা পরিশোধ করে নি:শ্ব হয়ে যায়। অর্থ উপার্জনের নেশায় মানুষ কত সহজে নিজেকে ছোট করে, কত সহজে নিজের মনুষ্যত্ব, আত্ম মর্যাদা, মান-সন্মান বিসর্জন দিতে পারে। অর্থ উপার্জনের নেশায় সত্যিই নীতি নৈতিকতা, আইন, বিবেক বিবেচনা, দেশ ও গণমানুষের কল্যাণের কথা চিন্তা করা হয়না। চিন্তা করার কোন সুযোগও নেই। যে কোন উপায়ে, যে কোন পথে অর্থ উপার্জন চাই। বৈধ অবৈধ বিবেচ্য নয়। নীতি নৈতিকতার প্রয়োজন নেই। অর্থ চাই। চাইই চাই। ২ ফেব্রুয়ারি, ২০১৫ প্রথম আলোর ‘পাকা বাড়িতে ভিজিডি কার্ড’ শিরোনামে এক প্রতিবেদনে উল্লেখ করা হয় ‘অন্যের জমিতে খুপুর ঘরে সংসার তানজিলা বেগমের। স্বামী জালাল উদ্দিন দিন মজুর। তাও ভিজিডি কার্ড জোটেনি তানজিলার কপালে। তাদের প্রতিবেশি শামসুল ইসলাম অবস্থা সম্পন্ন গৃহস্থ। পাকা বাড়ি। তার ছোট স্ত্রীর নামে ভিজিডি কার্ড বরাদ্দ হয়েছে। রাজশাহীর পুঠিয়া উপজেলার ভানুগাছি ইউনিয়নে তানজিলার মত কেউ কেউ ভিজিডি কার্ড পাননি। আবার শামসুল ইসলামের মতো বেশ কয়েকটি পরিবারের সদস্যরা ওই কার্ড পেয়েছেন।’ ২৫ ফেব্রুয়ারি, ২০১৫ কালের কণ্ঠ পত্রিকার একটি প্রতিবেদনের শিরোনাম ছিল ‘সামাজিক সুরক্ষা খাতের উপকারভোগী নির্বাচনে ব্যাপক অনিয়ম।’ এতে উল্লেখ করা হয় সরকারের গৃহিত সামাজিক নিরাপত্তা ও সুরক্ষা খাতের ৮৪ শতাংশ উপকার ভোগী নির্বাচনে অনিয়মের ঘটনা ঘটছে। এসব ঘটনা কী প্রমাণ করে? অর্থলিপ্সা মানুষকে পরিপূর্ণ অমানুষ করে তোলে। এসকল প্রতিবেদনে প্রমাণিত হয়েছে, অর্থ উপার্জনের নেশায় মানুষ নিজেকে কত ছোট করতে পারে। সামান্য চোখ বুঝেই আঁচ করা যায়। অর্থ লিপ্সার কাছে মানবতার ন্যূনতম কোন মূল্য নেই। মনুষ্যত্ববোধ, মায়ামমতা সব কিছুই তুচ্ছ, অবহেলিত।

মানুষকে ঠকিয়ে বা বঞ্চিত করে, প্রতারণা করে, শঠতা, কপটতার বিনিময়ে বিপুল অর্থ বিত্তের মালিক হওয়ার শিক্ষা মূলত: বাণিজ্যিক দৃষ্টিভঙ্গি থেকেই পাওয়া। এ শিক্ষা থেকে কোন উন্নয়ন হতে পারে এটি বিশ্বাসযোগ্য নয়। সমাজের যত অস্থিরতা, অশান্তি, অনিয়ম সবই দৃষ্টিভঙ্গি থেকেই উদ্ভূত।

বাণিজ্যিক দৃষ্টিভঙ্গি মানুষে মানুষে জাতিতে জাতিতে সাংস্কৃতিক বিভেদ, ভেদাভেদ, ব্যবধান, বৈষম্য গড়ে তোলে। আমাদের দেশে বিদেশীদের নিরাপত্তার জন্য কত কিছুই না করা হচ্ছে। বিশেষ করে ২৮ সেপ্টেম্বর, ২০১৫ তারিখে ঢাকার গুলশানে ইতালির নাগরিক সিজার তাভেলা এবং একই সপ্তাহে ০৩ অক্টোবর রংপুরের কাউনিয়ায় জাপানের নাগরিক হোশি কোনিও হত্যার পর বিদেশী নাগরিকদের নিরাপত্তার বেশ কিছু নতুন পদক্ষেপ গ্রহণ করা হয়। বিদেশী নাগরিকদের

নিরাপত্তার জন্য এসকল পদক্ষেপ নিস:ন্দেহে প্রশংসনীয়। প্রশ্ন হলো একজন ইউরোপীয় নাগরিকের নিরাপত্তার জন্য আমাদের দেশে যা করা হচ্ছে, সে দেশে অবস্থানরত আমাদের দেশের কোন নাগরিকের নিরাপত্তার জন্য তা করা হচ্ছে কি না? নিশ্চয়ই না। খালি চোখে যা দেখি বিভিন্ন কারণে ইউরোপীয় নাগরিকগণ এদেশে এসে থাকেন। বিভিন্ন প্রতিষ্ঠানের উপদেষ্টা, ইংরেজী শিক্ষা, খেলোয়ার, বিভিন্ন খেলার কোচ, বিশেষজ্ঞ, এনজিও, বহুজাতিক কোম্পানির কর্মী, দূতাবাস সহ বিভিন্ন ক্ষেত্রে কাজ করতে এসে দেশের বিভাগীয় শহর, জেলা শহর এমন কি গ্রামে গঞ্জে গিয়ে থাকেন। মানুষের আর্থিত্যতা দেখে তারা মুগ্ধ হন, বিমোহিত হন। উল্টোভাবে দেখলে আমাদের দেশেরও অনেক মানুষ বিভিন্ন কারণে ইউরোপীয় দেশগুলোতে যান। সেখানে কি তারা এমন আর্থিত্যতা পান? নিশ্চয়ই না। আর্থিত্যতার বদলে বরং বঞ্চনা ও অবহেলার শিকার হন। বিশেষ করে এসকল দেশে কর্মরত শ্রমজীবী মানুষেরা ব্যাপক ভাবে অবহেলিত হয়ে থাকেন। এ সাংস্কৃতিক বৈষম্য বাণিজ্যিক দৃষ্টিভঙ্গি থেকেই উদ্ভব। আমাদের দেশ সহ অনেক দরিদ্র দেশের শ্রমিকরা মধ্য প্রাচ্য সহ বিভিন্ন দেশে কাজ করছে। এসকল শ্রমিকদের অধিকাংশই তাদের ন্যায্য পাওনা থেকে বঞ্চিত হচ্ছে, অবহেলিত হচ্ছে। আবার পান থেকে চুন খসলেই তাদের কঠোর শাস্তির মুখোমুখী হতে হচ্ছে। এসকল শ্রমিকদের ব্যক্তিগত ত্রুটি রাষ্ট্রীয়ভাবে কূটনীতিতে প্রভাব পড়ছে। ভাবমূর্তির সংকটে পড়ছে পুরো দেশ। অথচ ধনী দেশগুলোর নাগরিকগণ অনেক অনাচার অপকর্ম করে চলছে তাতে সরকারের ন্যূনতম ড্রক্ষপ নেই। বাণিজ্যিক দৃষ্টিভঙ্গি আমাদের কোথায় নিয়ে যাচ্ছে?

দেশ, সমাজের প্রতি দায়িত্ববোধ ও দায়বদ্ধতার চেয়ে কোম্পানী, ব্যবসা প্রতিষ্ঠান, ব্যক্তি, গণমাধ্যম, ব্যাংক ও আর্থিক প্রতিষ্ঠানগুলো মুনাফার প্রতি ঝুঁকে থাকে। বাণিজ্যিক দৃষ্টিভঙ্গির এটাই মূল শিক্ষা। প্রতিটি ব্যক্তি ও প্রতিষ্ঠানের দেশ ও মানুষের প্রতি যে দায়িত্ব ও দায়বদ্ধতা আছে বাণিজ্যিক দৃষ্টিভঙ্গির মায়াজালে পড়ে এবিষয়টি অস্বীকার করে কেবল অর্থ ও মুনাফার পেছনে ছুটে থাকে।

বিশ্বব্যাপি আজ অসংখ্য আন্তর্জাতিক সংস্থা সক্রিয়। মানবাধিকার, নারী অধিকার প্রতিষ্ঠা, দুর্নীতি প্রতিরোধ, দারিদ্র্য বিমোচন, বিশ্ব শান্তি প্রতিষ্ঠা, শিক্ষা, স্বাস্থ্য, পরিবেশ, সুশাসন, টেকসই উন্নয়ন ইত্যাদি লক্ষ্য নিয়ে এসকল সংস্থা গড়ে উঠছে। এসকল সংস্থার কার্যক্রম পর্যালোচনা করলে দেখা যাবে তাদের লক্ষ্য ও উদ্দেশ্যের সাথে কার্যক্রমের কোন মিল নেই। তারা দরিদ্র দেশগুলোর দরিদ্র মানুষের আর্থ-সামাজিক অবস্থার উন্নয়নের চাইতে ধনী দেশের অর্থলিপ্সু কোম্পানীগুলোর মুনাফা লাভের পথ সুগম করার জন্য ব্যতিব্যস্ত। কাগজে কলমে সুন্দর সুন্দর কথা বলে থাকলেও বাস্তবে তাদের জন্ম ধনী দেশগুলোর লুণ্ঠনের অর্থনীতি প্রতিষ্ঠিত করা- বাণিজ্যতন্ত্রকে প্রসারিত করা। রোহিঙ্গা জনগোষ্ঠী আজ কত অসহায়। গণমাধ্যমের বদৌলতে তাদের দুর্দশার চিত্র যা দেখি তা থেকে বলতে পারি এযুগে মানবতা বলতে কিছু আছে বলে মনে হয়না। রোহিঙ্গাদের ব্যাপারে আন্তর্জাতিক সংস্থাগুলোর পদক্ষেপ দেখে হতবাক হতে হয়। রোহিঙ্গাদের পক্ষ নিয়ে অনেক সংস্থা কথা বলছে, পাশে দাঁড়ানোর কথা বলা হচ্ছে। কিন্তু এ সমস্যা স্থায়ী সমাধানের কোন উদ্যোগ চোখে পড়ছেনা। বিষয়টি উদ্ভট নয় কি?

বাণিজ্যতন্ত্রের একটি অন্যতম বৈশিষ্ট্য হলো শোষণ বঞ্চনার বিরুদ্ধে লিখে মানুষকে প্রভাবিত করা, প্ররোচিত করার পথ রুদ্ধ করে দেওয়া। আগে একটি বই মানুষকে আলোড়িত করত। বাণিজ্যতন্ত্র বিকাশের ফলে মানুষের কথা বলে, মানবিকতার কথা বলে এমন লিখা বই মানুষকে প্রভাবিত করেনা। ড. মুহাম্মদ শহীদুল্লাহ বলেছেন, মাতা, মাতৃভূমি আর মাতৃভাষা এই তিনটি মানুষের কাছে পরম শ্রদ্ধার বস্তু। চরিত্র গঠন, ভালো মানুষ হিসেবে প্রতিষ্ঠার উপদেশ এখন আর মানুষকে তেমন উদ্ভুদ্ধ করেনা। মননশীল মানসিকতা, সৃজনশীলতা ক্ষয়ে আসছে ক্রমশ:। ডা. লুৎফর রহমানের মহৎ জীবন, উন্নত জীবন বইগুলোর মত বইয়ের কদর ও গুরুত্ব দিনে দিনে কমে যাচ্ছে। স্বাধীন মত প্রকাশের সংস্কৃতিতেও বাণিজ্যিক প্রবণতা পরিলক্ষিত হচ্ছে। এ যুগে মত প্রকাশের স্বাধীনতার বিষয়টি প্রতিষ্ঠিত বলা হলেও এখন মত প্রকাশের ক্ষেত্রে প্রায় সবাই সতর্ক থাকে। ইংরেজি সাহিত্যের মহাকবি জন মিল্টন আজীবন অনাচারের বিরুদ্ধে লিখে গেছেন। ১৬৪৪ সালের ২৩

নভেম্বর তাঁর বিখ্যাত গ্রন্থ *Areopagitica* প্রকাশিত হয়। বাক স্বাধীনতা প্রতিষ্ঠিত করতে গিয়ে এই গ্রন্থ রচনা করার আগে তিনি বুঝতে পেরেছিলেন তার ওপর অত্যাচার, নির্যাতন এমন কি মৃত্যুর হুমকিও আসতে পারে। কিন্তু এই গ্রন্থ রচনা করতে পিছপা হননি। ১৬৪৩ সালে রাজার নির্দেশে 1643 Ordinance for the Regulation of Printing এর মাধ্যমে বাক স্বাধীনতা, সংবাদ পত্রের স্বাধীনতা, রাজনৈতিক বিষয়ে লেখার স্বাধীনতা কেড়ে নেওয়া হলে মুদ্রণ ও বাক স্বাধীনতার পক্ষে জন মিল্টনের লিখা এই বিখ্যাত গ্রন্থ শুধু ইংল্যান্ডে নয়, সমগ্র বিশ্বের মানুষের বাক স্বাধীনতা, মুদ্রণ স্বাধীনতা সংগ্রামের এক জীবন্ত দলিল। আমাদের দেশে বৃটিশ শাসন, শোষণ এর বিরুদ্ধে যারা কলম ধরেছেন তারা নির্যাতিত হয়েছেন। আবার বৃটিশদের তোষন করে যারা লিখেছেন তারা পুরস্কৃত হয়েছেন, পৃষ্ঠপোষকতা পেয়েছেন। দীনবন্ধু ছিলেন মাটির কাছাকাছি মানুষ। তিনি ছিলেন কৃত্রিমতার বিরোধী এবং সত্যের অনুসারী। বৃটিশদের রক্ত চক্ষু উপেক্ষা করে তাঁর মত মানব হিতৈষী মননশীল ব্যক্তি সাধারণ মানুষের পক্ষে লিখেছেন। মমতাজউদদীন আহমদ তার সম্পাদিত দীনবন্ধু মিত্রের নীলদর্পণ নাটকের নীলদর্পণ পাঠের ভূমিকায় লিখেছেন, নীলদর্পণের রাজনৈতিক ভাগ্য দীনবন্ধু আঁচ করেছিলেন, কিন্তু সেন্টিমেন্ট উত্তেজনাকে শ্রদ্ধা করতেন বলে নীলদর্পণ প্রকাশে সংকুচিত হননি। বিবেকের নির্দেশে ‘নীলকর-বিষধরদংশন-কাতর’ নানা স্থলের পথিক সরকারি কর্মচারী দীনবন্ধু নীল দর্পণ প্রকাশ করে মহৎ সাহসের কাজ করেছিলেন। আমাদের জাতীয় কবি কাজী নজরুল ইসলাম ন্যায়ের প্রশ্নে কোন দিন আপোষ করেনি। বাংলা সাহিত্যের ইতিহাসে তিনি বিদ্রোহী কবি এবং আধুনিক বাংলা গানের জগতে বুলবুল নামে পরিচিত। জেল-জুলুম, অত্যাচার, নির্যাতন করেও তাকে সত্য বলা থেকে বিরত রাখতে পারেনি। তিনি আজীবন অন্যায়া অনাচারের বিরুদ্ধে ও সত্য ও ন্যায়ের পক্ষে কথা বলেছেন। এ যুগের বুদ্ধিজীবীরাও সত্য কথা বলেন। কিন্তু এ সত্য বলেন মধ্যপন্থা অবলম্বন করে, আপোষের মনোভাব থাকে। গুছিয়ে গাছিয়ে এমন কৌশলে সত্য বলেন যাতে সকল পক্ষই খুশী হয়। যাতে সকল পক্ষ থেকে সুযোগ বোঝে সুবিধা নেওয়া যায়। একজন উপন্যাসিক উপন্যাস লিখার আগে চিন্তা করেন, কোন কোন শব্দ কিভাবে স্থাপন করা হলে তাঁর গ্রন্থটি বেশি বিক্রি হবে। সুতরাং সত্যিকার অর্থে এটি স্বাধীন মত প্রকাশ নয়। সত্য হলো দিন যতই যাচ্ছে স্বাধীনভাবে মত প্রকাশের মানুষের সংখ্যা কমে আসছে।

ব্যতিক্রম ব্যবস্থার প্রবর্তন ও উন্নয়ন পৃথিবীতে ব্যাপক পরিবর্তন এনেছে। ব্যতিক্রম ব্যবস্থায় প্রযুক্তির সংযোগ করে আধুনিক কালে আরো যুগোপযোগি করে মানুষের জীবনকে গতিশীল, স্বাচ্ছন্দ্যময় করে গড়ে তোলছে। কিন্তু এ ব্যতিক্রম ব্যবস্থায় বিশ্ব ব্যাপি গণমানুষের কোন উন্নয়ন করতে পেরেছে কি? প্রশ্ন আছে এ নিয়ে। আধুনিক ব্যতিক্রম বাণিজ্যবাদকে অনেক এগিয়ে নিয়ে যাচ্ছে। কিন্তু গণ মানুষের আর্থ-সামাজিক উন্নয়ন তথা প্রকৃত টেকসই উন্নয়নে কোন ভূমিকা নেই। আমাদের দেশে যা দেখে চলছে, ব্যাংকগুলো কেবল স্বচ্ছল ব্যবসায়ী শ্রেণি যাদের অচেল সম্পদ আছে কেবল তাদেরই মোটা অংকের ঋণ প্রদান করে আসছে। ক্ষুদ্র ব্যবসায়ী, চাকুরিজীবী, কৃষক, শ্রমজীবী দরিদ্র সাধারণ মানুষের জন্য ব্যতিক্রম করতে তেমন আগ্রহী নয়।

বাণিজ্যিক দৃষ্টিভঙ্গি সত্যকে আড়াল করে রাখে। বাণিজ্যিক দৃষ্টিভঙ্গি থেকে দেখলে আমরা পৃথিবীতে ব্যাপক উন্নয়ন লক্ষ্য করি। শিক্ষা, অবকাঠামো, মানব সম্পদ উন্নয়ন সহ অর্থনৈতিক সামাজিক উন্নয়নে দ্রুত উন্নয়ন সাধিত হচ্ছে। এর নেপথ্য কারণ জ্ঞান বিজ্ঞানের ব্যাপক উন্নয়ন। সত্যি কি তাই? জ্ঞান বিজ্ঞানে আমরা কি সত্যিই এগিয়ে যাচ্ছি? মানব পাচারের কথাই বিবেচনা করি। বিশ্ব ব্যাপি মানব পাচার আজ এক ভয়াবহ সমস্যা। অমানবিক হলেও দিন দিন বেড়েই চলছে মানব পাচারের পরিমাণ। গত ২৭ জুলাই, ২০১৫ তারিখে United states Department of State কর্তৃক প্রকাশিত 2015 Trafficking in Persons Report – Bangladesh নামে এক প্রতিবেদনে উল্লেখ করা হয় “Bangladesh is primarily a source and to lesser extent a transit and destination country for men, women and children subjected to forced labor and sex trafficking”. ২৪ জুলাই ২০১৫

তারিখে সমকাল এ প্রকাশিত “সীমান্তের অনেক কর্মকর্তা মানব পাচারে জড়িত ” শিরোনামে এক প্রতিবেদনে স্বরাষ্ট্র মন্ত্রণালয় সূত্র থেকে উল্লেখ করা হয়, কক্সবাজারের টেকনাফ, উখিয়া সহ সীমান্ত এলাকায় ঘুরেফিরে পোস্টিং নেওয়া কর্মকর্তাদের বিরুদ্ধে মানব পাচারে জড়িত থাকার অভিযোগ উঠেছে। এসকল কর্মকর্তাদের বদলী করা হলেও তদবির করে এই এলাকায় থেকে যায়। মানব পাচারকারীদের সাথে এসব কর্মকর্তাদের সাথে বিশেষ সখ্য রয়েছে এবং রাতারাতি বিপুল অর্থের মালিক বনে গেছেন। বিশ্ব জুড়ে নারী, শিশু, মানব পাচার উদ্বেগ জনক হারে বাড়ছে। এমন অবস্থায় জ্ঞান বিজ্ঞানে এগিয়ে যাচ্ছি দাবী করা যৌক্তিক হবে কি? তবে কি মানব পাচার শূণ্যের কোটায় নামিয়ে আনা সম্ভব। হয় তো সম্ভব নয়। কিন্তু মানব পাচার দিনে দিনে না বেড়ে ক্রমান্বয়ে তা কমান কথা। তাহলেই কেবল আমাদের জ্ঞান বিজ্ঞানে এগিয়ে যাওয়ার দাবী যৌক্তিক বলা যাবে। একজন রাষ্ট্রনায়ক হবে মানবতাবাদি, মানব কল্যাণে নিবেদিত প্রাণ। একই সাথে পরমত সহিষ্ণু, উদার, অসাম্প্রদায়িক, পরধর্মের প্রতি শ্রদ্ধাশীল, বিশ্ব শান্তি ও স্থিতিশীলতা রক্ষায় নিরলস কর্মী। কিন্তু বর্তমান বিশ্ব রাজনীতিতে বিচিত্র সব ঘটনা ঘটে চলছে। পরধর্মের প্রতি বিদ্বেষ ছড়িয়ে, উগ্র, সাম্প্রদায়িক, বিশ্ব শান্তি ও স্থিতি শীলতার প্রতি হুমকি তৈরী করে ক্ষমতাস্বার্থে রাষ্ট্রগুলোতে জনগণের রায় নিয়ে রাষ্ট্রনায়ক বনে যাচ্ছে। এথেকে কি বলতে পারি বিশ্ব সত্য সত্যিই জ্ঞান বিজ্ঞানে এগিয়ে যাচ্ছে? গত ৩১ জুলাই, ২০১৫ রাত ১২ টা ১ মিনিটে বাংলাদেশ ও ভারতের মধ্যকার ৬৮ বছরের পুঞ্জীভূত ছিটমহল সমস্যার অবসান হয়। আমরা দেখছি আন্তরিকতা থাকলে কত দ্রুত কত সহজে ছিটমহল সমস্যার মত সমস্যা সমাধান করা যায়। প্রশ্ন হলো বিগত ৬৮ বছর ধরে এ সমস্যা কেন টিকে থাকে? কিভাবে টিকে থাকে? এর আগে গেলে ছিটমহল সমস্যার উদ্ভব হলো কেন? আমরা যে দাবী করছি আমরা জ্ঞান বিজ্ঞানে এগিয়ে যাচ্ছি ৬৮ বছরের ছিটমহল সমস্যা কি প্রমাণ করে দেয় আমরা সত্য সত্যিই এগিয়ে যাচ্ছি? মধ্য প্রাচ্য সংকটের দিকে তাকালে কী দেখি? ১৯৯০ সালে দ্বি মেরু ভিত্তিক বিশ্ব থেকে এক কেন্দ্রিক বিশ্ব ব্যবস্থা প্রবর্তিত হয় সোভিয়েত ইউনিয়ন পতনের মধ্য দিয়ে। সোভিয়েত ইউনিয়ন পতনের পর পরই মার্কিন পশ্চিম ইরাক সরকার মার্কিন সরকারের চক্ষুশূলে পরিণত হয়। কাল বিলম্ব না করে মার্কিন সরকার ইরাক আক্রমণ করে। পরবর্তীতে মার্কিন সরকারের পরিবর্তন হলে ইরাকের উপর আক্রমণ বন্ধ হয়। ২০০১ সালে নয়/এগারোর পর মার্কিন জোট আফগানিস্তান, ইরাক, লিবিয়া প্রভৃতি দেশে সরাসরি আক্রমণ চালিয়ে চরম অশান্তি ও অস্থিরতা সৃষ্টি করে। শান্তি প্রতিষ্ঠার নামে মূলত: মার্কিন জোট পাকিস্তান থেকে শুরু করে আফ্রিকার প্রায় পুরো অংশের কোটি কোটি মানুষকে জিম্মি করে রেখেছে। সাদ্দাম গাদ্দাফীদের অনেক দোষ ছিল সন্দেহ নেই। প্রশ্ন হলো সাধারণ মানুষের মুক্তি, গণতন্ত্র, সুশাসন, মানবাধিকার প্রতিষ্ঠার কথা বলে মার্কিন জোট এসব দেশে আক্রমণ চালালে সাধারণ মানুষের আদৌ কোন উন্নতি হয়েছে কি? সাদ্দামের আমলে ইরাকের সাধারণ মানুষ শান্তিতে ছিল, নিরাপদে ছিল, ইরাক ছিল সমৃদ্ধশীল দেশ। একই কথা গাদ্দাফির আমলের লিবিয়ার ক্ষেত্রেও প্রযোজ্য। আজকের বাস্তবতায় কেবল ইরাক, লিবিয়ার জনগণ নয় বিশ্বের এক বিরাট এলাকার সাধারণ মানুষ এখন চরম দুর্দশায় নিমজ্জিত। এ অঞ্চলের কোটি কোটি নারী ও শিশুর ভবিষ্যৎ এখন চরম অন্ধকারে। এটা কি প্রমাণ করে আমরা প্রকৃত অর্থে এগিয়ে যাচ্ছি। বিশ্ব ব্যাপি এরকম হাজারো সংকট তৈরী হচ্ছে, জিইয়ে রাখা হচ্ছে, যেগুলো মধ্যযুগীয় বর্বরতাকেও হার মানায়। সুতরাং জ্ঞান বিজ্ঞানে আমরা এগিয়ে যাচ্ছি না। সত্য হলো বিশ্ব ব্যাপি সংখ্যা গরিষ্ঠ শ্রমজীবী সাধারণ কৃষক, মজুর, কুলিদের সৃষ্টি করা সম্পদ কতিপয় মানুষ কুক্ষিগত করে বিলাস বহুল জীবন যাপন নিশ্চিত করেছে। বাণিজ্যতন্ত্র এটাকেই উন্নয়ন বলছে। বাণিজ্যতন্ত্র এটাকেই বলছে জ্ঞান বিজ্ঞানের প্রসার। সত্যকে আড়াল করার এ যেন এক ভয়াবহ অপকৌশল।

বাণিজ্যিক দৃষ্টিভঙ্গির প্রসার উন্নত দেশগুলোর মুষ্টিমেয় মানুষের সীমাহীন বিলাসী জীবন যাপন উৎসাহিত করেছে। তৃতীয় বিশ্বের দরিদ্র শ্রমজীবী মানুষের দুর্ভোগ, দুর্গতি বাড়ুক- সে দিকে কোন দ্রুতগতি নেই। তাদের দুর্দশার কথা বলা হয় সত্য। তাদের আর্থ-সামাজিক অবস্থার উন্নয়নে পদক্ষেপ নেয়া হয়। কিন্তু বাস্তবে কোন উন্নয়ন হয়না। দিন রাত পরিশ্রম করেও

এসকল দেশের বিপুল সংখ্যক মানুষ দু'বেলা ভাত খেতে পারেনা- সে দিকে খেয়াল দেয়ার সময় কোথায় ? বাণিজ্যিক দৃষ্টিভঙ্গি তাই চতুর এক চোখা ।

বাণিজ্যিক দৃষ্টিভঙ্গি সময়ের অগ্রযাত্রাকে ব্যাহত করছে । মানব সভ্যতার অগ্রগতিকে ক্ষতিগ্রস্ত করে মানুষের অধিকার প্রতিষ্ঠার পথ রুদ্ধ করে চলছে । পৃথিবীর সত্যিকার উন্নয়নে বাণিজ্যিকতার ভেরাজাল থেকে বেরিয়ে আসতে হবে ।

প্রতিটি মানুষই স্বচ্ছলতা চায় । পরিবার পরিজন নিয়ে স্বচ্ছল ভাবে জীবন যাপন করার প্রবণতা মানুষের একটি স্বাভাবিক সহজাত প্রবৃত্তি । একজন যৌক্তিক মানুষ স্বচ্ছলভাবে জীবন যাপনের প্রত্যাশা করতেই পারে । কিন্তু সে স্বচ্ছলতা প্রাপ্তির জন্য মানুষের মেধা, সৃজনশীলতা, পরিশ্রমের সমন্বয় চাই । মানুষ তার যোগ্যতা, কর্মদক্ষতা, সততার বিনিময়ে সুন্দর ভাবে স্বচ্ছল জীবন যাপন করতে পারে । রাষ্ট্র, সমাজ তথা সকল মানুষের উচিত সেরকম একটি অবস্থান তৈরী করা । সৎভাবে অর্থ উপার্জন করে স্বচ্ছল ভাবে জীবন যাপনের প্রতি সকলেরই সমর্থন থাকা উচিত । পরিতাপের বিষয় হলো বাণিজ্যিক দৃষ্টিভঙ্গি এ সত্যকে অস্বীকার করে । বাণিজ্যতন্ত্রে সততা, মেধা, যোগ্যতার কোন স্থান আছে বলে মনে হয়না । বাণিজ্যতন্ত্রে যে কোন উপায়ে অর্থ উপার্জন চাই । নীতি নৈতিকতা, সততা, বিবেক বিবেচনা বোধ, মনুষ্যত্ববোধের ধার ধারেনা । বাণিজ্যিক দৃষ্টিভঙ্গি আজ এমন ভাবে প্রতিষ্ঠিত যে, আধুনিক কল্যাণ রাষ্ট্র নামধারী রাষ্ট্রগুলো নীতি নৈতিকতা বহির্ভূত, বেআইনি, গর্হিত অন্ধকার পথে অর্থ উপার্জন ঠেকাতে পারছেনা । সারা বিশ্ব ব্যাপি আজ কালো টাকার দাপট । ৫ এপ্রিল, ২০১৬ তারিখে সমকাল পত্রিকার পানামা পেপারস' নিয়ে একটি প্রতিবেদন প্রকাশ করে । এতে উল্লেখ করা হয়, পানামার একটি ল ফার্ম মোসাক ফনসেকার ১ কোটি ১৫ লাখ গোপন নথি ফাঁস হওয়ার পর বিশ্বজুড়ে তোলপাড় শুরু হয়ে যায় । পানামা পেপারস' খ্যাত ওই নথিগুলোতে জানা গেছে, বিভিন্ন দেশের রাষ্ট্রনেতা থেকে শুরু করে ধনী ও ক্ষমতাস্বত্ব ব্যক্তি, নামিদানি চলচিত্র অভিনেতা, খেলোয়াড়রা কৌশলে কর ফাঁকি দিয়ে বিদেশে গোপনে সম্পদের পাহাড় গড়ে তোলেছেন । এ তালিকায় বর্তমান ও সাবেক মিলিয়ে অন্তত: ৭২ জন রাষ্ট্রপ্রধানের নাম প্রকাশ পায় । পানামা পেপারস' থেকে কালো টাকার বিস্তৃতি সম্পর্কে একটি সামান্য ধারণা পাওয়া যায় মাত্র । মোদা কথা, সৎ পথে থেকেও মানুষের কল্যাণ নিশ্চিত করে দেশ ও সমাজের বিঘ্ন না ঘটিয়েও কাড়ি কাড়ি অর্থ উপার্জন করা যায় । প্রচুর বিত্ত বৈভবের মালিক হওয়া যায় । বাণিজ্যিক দৃষ্টিভঙ্গি তা পরিহার করে বরং অবৈধ ও অনৈতিক উপায়ে অর্থ উপার্জনকেই অধিক গুরুত্ব দিয়ে থাকে । এক কথায় বাণিজ্যিক দৃষ্টিভঙ্গি একজন মানুষকে পরিপূর্ণ অমানুষ হিসেবে গড়ে তোলে ।

বিজ্ঞানের হাজারো আবিষ্কার মানব কল্যাণে কাজে লাগানোর সুযোগ আছে । বিজ্ঞানীরা মানুষের কল্যাণের কথা ভেবেই তাদের মেধা ও মননের সর্বোত্তম ব্যবহার করে নিরলস পরিশ্রম করে বিভিন্ন আবিষ্কার করে চলেছেন । কিন্তু এসকল আবিষ্কার হয়ে উঠছে মুষ্টিমেয় ব্যক্তির মুনাফা লাভের হাতিয়ার । বাণিজ্যিক দৃষ্টিভঙ্গির কাছে মানব কল্যাণ আজ ভুলঠিত । মানুষের শৈল্পিক সত্তা উপেক্ষিত ।

বাণিজ্যিক দৃষ্টিভঙ্গি আজ এক প্রবল প্রতাপশালী দর্শন, সর্বগ্রাসী সংস্কৃতি যার কাছে গোটা বিশ্ব নতজানু, অসহায় অবরুদ্ধ হয়ে গেছে । বাণিজ্যিকতার অন্ধকার রূপ দেখে বিশ্ব বিবেক বাকরুদ্ধ, হতবাক । সভ্যতা সব কিছুই দেখছে, শুনছে, বুঝে চলছে- কিন্তু কিছুই করতে পারছেনা- যেন কিছুই করার নেই ।

৬. প্রয়োজন মানবিক দৃষ্টিভঙ্গি প্রসার :

প্রশ্ন হলো এ থেকে পরিব্রাণের উপায় কী ? এ থেকে পরিব্রাণের উপায় হলো মানবিক শিক্ষার প্রসার । বাণিজ্যিকতার কবল থেকে গোটা বিশ্বকে তথা বিশ্ব বাসীকে রক্ষা করার প্রত্যয়ে মানবিক দৃষ্টিভঙ্গি প্রসারে সবার আগে বিশ্ব নেতৃত্বকে একত্রে বসতে হবে । কূটনৈতিক, অর্থনৈতিক, সামাজিক তথা পারস্পরিক সম্পর্ক স্থাপনে বাণিজ্যিক স্বার্থ থাকবে । এতে বাণিজ্যিক দৃষ্টিভঙ্গি পরিহার করে মানবিকতাকে নতুন করে প্রতিষ্ঠিত করতে হবে । আন্তর্জাতিক সংগঠন প্রতিষ্ঠা, রাজনীতি, আইন প্রণয়ন থেকে শুরু করে সকল ক্ষেত্রে সকল স্থরে মানবিকতাকে প্রধান্য দিতে হবে ।

বাণিজ্যিক দৃষ্টিভঙ্গি নয় বিশ্ব ব্যাপি শিক্ষা হবে মানবিকতাকে পাকাপোক্ত করার হাতিয়ার। বাণিজ্যিক শিক্ষাকে পরিত্যাগ করে মানবিক শিক্ষা বিশ্ব ব্যাপি গ্রহণ করা গেলেই কেবল প্রকৃত উন্নয়ন তথা টেকসই উন্নয়ন নিশ্চিত হবে। শিক্ষাকে মানবিকরণ করতে হবে। শিক্ষাকে মানবিকরণ করে অর্থনীতি, রাজনীতি, কূটনীতিকে মানবিকরণ করা সহজ হবে এবং বিশ্ব ব্যাপি বৈপ্লবিক পরিবর্তন আনা সম্ভব। বিশ্ব ব্যাপি মানবিক শিক্ষার প্রসারের ফলে কি কি পরিবর্তন আনা সম্ভব- অনুমান করি।

১. সারা বিশ্ব থেকে দুর্নীতি সমূলে উৎপাটন করা সম্ভব।

২. দারিদ্র্যমুক্ত সমাজ প্রতিষ্ঠার কাজটি খুব সহজে অনায়াসেই প্রতিষ্ঠা করা যাবে।

৩. অসুস্থতা, অসহায়ত্ব, অপুষ্টি, ক্ষুধা, শোষণ, বঞ্চনামুক্ত সমাজ প্রতিষ্ঠা করার কাজটি সহজতর হবে।

৪. প্রতিটি দরিদ্র, শ্রমজীবী সাধারণ মানুষের আর্থ-সামাজিক অবস্থার উন্নয়ন বা স্বচ্ছল ও নিরাপদ জীবন যাপন সম্ভব হবে।

৫. শিক্ষাকে মানবিকরণ সম্ভব হলে বর্তমানে যে উন্নয়ন বিশ্ব ব্যাপি দৃশ্যমান তার চেয়ে সহশ্রুণ্ড উন্নয়ন নিশ্চিত করা যাবে।

৬. গণমুখী ব্যাংকিং ব্যবস্থা প্রবর্তন করা সম্ভব হবে। এতে বিশ্ব ব্যাপি ব্যাংকিং ব্যবস্থা জনকল্যাণে মুনাফার কথা বাদ দিয়ে অলাভজনক প্রতিষ্ঠান হিসেবে গড়ে উঠবে। অনুরূপ গণমাধ্যম কর্পোরেট পুঁজির কবল থেকে মুক্ত হবে। গণমাধ্যমও সত্যিকার অর্থে বিশ্ব ব্যাপি অলাভজনক প্রতিষ্ঠান হিসেবে গড়ে উঠবে। গণমাধ্যম কাঠামো এমন ভাবে ঢেলে সাজাতে হবে গ্রামের প্রত্যন্ত অঞ্চলে কী ঘটছে? সাধারণ মানুষের সমস্যাগুলো কী? তাদের সম্ভাবনা তথা টেকসই উন্নয়ন নিশ্চিত করে এমন খবর প্রচারে প্রধান্য দিবে। শিক্ষা, স্বাস্থ্য, বিনোদন এসব বিষয়গুলো শতভাগ ব্যয়মুক্ত করা যাবে।

৭. মানবিক দৃষ্টিভঙ্গির প্রতি ভিত্তি করে সারা পৃথিবী থেকে দুর্নীতি, দারিদ্র্য, অত্যাচার, অনাচার প্রায় শতভাগ দূর করা সম্ভব।

৮. সকল উৎপাদন কার্যক্রম পরিচালিত হবে জনস্বার্থে। জনস্বার্থ নিশ্চিত করেই তবে মুনাফার প্রশ্ন আসবে। লাগামহীন মুনাফা অর্জনের অপ সংস্কৃতি থেকে উৎপাদক শ্রেণি বেরিয়ে আসবে। পৃথিবীতে ক্ষুধা, দারিদ্র্য, অপুষ্টি সংঘাত বলে কিছু থাকবে না। বৈষম্য, বিভেদ, হানাহানি, অনাচার, অরাজকতা দূর হবে।

৯. অর্থনীতিকে মানবিকরণ করা সম্ভব হবে। গোটা বিশ্বের অর্থনীতিতে বাণিজ্যিকতা বলতে কিছু থাকবে না। সকল দেশের সকল অর্থনীতিতে থাকবে মানবিকতার জয় জয়কার। এজন্য মুনাফা সর্বোচ্চকরণ তত্ত্বকে সম্পূর্ণরূপে পরিহার করতে হবে। মানব কল্যাণে তথা দেশ ও মানুষের স্বার্থে উৎপাদন সর্বোচ্চকরণ তত্ত্ব ফিরে যাওয়া বাঞ্ছনীয়। একই সাথে বিশ্ব ব্যাপি রাজনীতি ও কূটনীতিতে পরিবর্তন আসবে। দ্বিপাক্ষিক বা বহুপাক্ষিক যাই বলি না কেন কূটনৈতিক সম্পর্ক স্থাপনে মূলকথা হবে মানবতা, পারস্পরিক শ্রদ্ধাবোধ, সহযোগিতা, সহমর্মিতা ইত্যাদি। বিশ্ব রাজনীতি ও কূটনীতিকে মানবিকরণ করে পৃথিবীকে আরো অনেক দূর এগিয়ে নেওয়া সম্ভব।

১০. পৃথিবীর প্রতিটি নাগরিকই স্বচ্ছলভাবে জীবন যাপন করতে পারে এরকম একটি বিশ্ব ব্যবস্থা গড়ে তোলা সম্ভব। স্বচ্ছলভাবে জীবন যাপন মানে বিলাসিতা নয়। চাহিবা মাত্রই যেন প্রত্যেকেই তার মৌলিক চাহিদা তথা খাদ্য, বস্ত্র, বাসস্থান, চিকিৎসা, বিনোদন নিশ্চিত করতে পারে এরকম একটি অবস্থান তৈরী করা।

১১. পৃথিবীর প্রতিটি মানুষকে শিক্ষিত, সচেতন, মানবতাবাদী, উদার, অসাম্প্রদায়িক, সংস্কৃতিবান এক পরিপূর্ণ মানুষ হিসেবে গড়ে তোলতে মানবিক দৃষ্টিভঙ্গির প্রসারের কোন বিকল্প নেই। প্রতিটি মানুষকে সংস্কৃতিবান হিসেবে গড়ে তোলতে সক্ষম হলেই পৃথিবী থেকে সকল অনাচার দূর করা সম্ভব।

এমন একটি ব্যবস্থা চালু করার পথে প্রধান বাঁধা বাণিজ্যিকতা। এই বাণিজ্যিকতাই বিশ্বের সংখ্যা গরিষ্ঠ সাধারণ মানুষের মুক্তির কথা না ভেবে মুষ্টিমেয় মানুষের বিলাসী জীবন নিশ্চিত করতে চায়। টেকসই প্রকৃত উন্নয়নে এমন সংস্কৃতির অবসান হওয়া সময়ের দাবী।

পৃথিবীর প্রতিটি মানুষই এক একজন সুবিবেচক নাগরিক। এসত্য প্রতিষ্ঠিত করতে মানবিক দৃষ্টিভঙ্গি প্রতিষ্ঠার নিরন্তর, দুর্বীর, অপ্রতিরুদ্ধ সামাজিক আন্দোলন গড়ে তোলতে হবে। পৃথিবীর প্রতিটি নাগরিকের শিক্ষা, স্বাস্থ্যের অধিকার নিশ্চিত করতে সবার আগে আই মানবিক দৃষ্টিভঙ্গির প্রতিষ্ঠা। শিক্ষা, স্বাস্থ্য, পরিবেশ উন্নয়ন, মানবাধিকার, সুশাসন, আইনের শাসন, শোষণমুক্ত, দারিদ্র্য মুক্ত, দুর্নীতিমুক্ত সমাজ গড়তে মানবিক দৃষ্টিভঙ্গি প্রতিষ্ঠা আজ বড় প্রয়োজন।

৭. শেষ কথা :

সুতরাং উন্নয়ন কেবল বাণিজ্যিক দৃষ্টিভঙ্গির দিক থেকে বিবেচনা কাম্য নয়। আজ সময় এসেছে এবিষয়ে চুলছেড়া বিশ্লেষণ করার। বাণিজ্যিক দৃষ্টিভঙ্গি আজ বিশ্ব মানবতার শত্রু। বাণিজ্যিকতা আজ আমাদের এক ঘন অন্ধকারের দিকে নিয়ে যাচ্ছে। এবিষয়ে আমাদের নতুন করে ভাবতে হবে। পৃথিবীতে সত্যিকার উন্নয়ন সাধন করতে হলে, টেকসই উন্নয়ন নিশ্চিত করতে চাইলে আমাদেরকে পরিশোধিত হতে হবে। বাণিজ্যিক দৃষ্টিভঙ্গি পরিহার করে মানবিকতার কথা ভাবতে হবে। বিশ্ব শান্তি, মানবতা, গণমানুষের কল্যাণ তথা একটি বাসযোগ্য পৃথিবী গড়ার প্রত্যয়ে আজ আমাদের বাণিজ্যিকতার বিরুদ্ধে ঐক্যবদ্ধ মনোভাব গড়ে তোলতে হবে। বাণিজ্যিক দৃষ্টিভঙ্গি সংকোচিত হোক। পৃথিবীর সর্বত্র জ্ঞান ও ন্যায় ভিত্তিক সমাজ প্রতিষ্ঠিত হোক। আমাদের ব্রত হোক মানবতার-

References :

1. Jalil, M. A.: Bangladesh Economy in a Globalization World, BANGLADESH JOURNAL OF POLITICAL ECONOMY, vol 28, Number 1, June 2012.
2. Lee, Eddy and Marco Vivarelli, The Social Impact of Globalization in the Developing Countries, Forschungsinstitut zur Zukunft der Arbeit Institute for the Study of labor, January, 2006.
3. Marching towards Growth, Development and Equitable Society, Budget Speech, 2016-17, Ministry of Finance, Peoples Republic of Bangladesh, 02 June, 2016.
4. Internet.
5. United States Department of state : Trafficking in Persons Report, Bangladesh, 27 July, 2015.
৬. গণপ্রজাতন্ত্রী বাংলাদেশ সরকার : বাংলাদেশ অর্থনৈতিক সমীক্ষা, অর্থ মন্ত্রণালয়, ২০১৬।
৭. দীনবন্ধু মিত্র, নীলদর্পণ, সম্পাদনায় মমতাজউদদীন আহমদ, বিশ্ব সাহিত্য ভবন, ২০০৫।
৮. বারকাত, আবুল : “বাংলাদেশে দারিদ্র্য- বৈষম্য- অসমতা : একীভূত রাজনৈতিক অর্থনীতির সন্ধানে”, লোকবক্তৃতা ২০১৪, ঢাকা বিশ্ববিদ্যালয় সিনেট অডিটোরিয়াম, ঢাকা, ২২ মার্চ, ২০১৪।
৯. বাংলা পিডিয়া (খন্ড ২) : বাংলাদেশ এশিয়াটিক সোসাইটি, মার্চ, ২০০৩।
১০. বাংলা পিডিয়া (খন্ড ৪) : বাংলাদেশ এশিয়াটিক সোসাইটি, মার্চ, ২০০৩।
১১. সমকাল, ইন্ডেফাক, কালের কণ্ঠ, প্রথম আলো সহ বিভিন্ন দৈনিকের বিভিন্ন প্রতিবেদন, কলাম, ফিচার।